

M312: Hartmann von Aue: Iwein (B)

0,1 Swer an rehte gvete .
0,2 wendet sin gemvete .
0,3 dem volget saelde vn- ere .
0,4 des git gewisse lere .
0,5 kvnech Artus der gvote .
0,6 der mit riters mvote .
0,7 nach lobe kvnde striten .
0,8 er hat bi sinen ziten .
0,9 Gelebt also schone .
0,10 daz er der eren krone .
0,11 do trvot . vn- noch sin nam treit .
0,12 des habent die warheit .
0,13 Sine lantlivte .
0,14 Si iehent er lebe noch hivte .
0,15 er hat den lop erworben .
0,16 ist im der lip erstorben .
0,17 So lebt doch iemer sin nam .
0,18 er ist lasterlicher scham .
0,19 iemer vil gar erwert .
0,20 der noch nach sinem site vert .
0,21 Ein riter der gelert was .
0,22 vn- ez an den bvochen las .
0,23 Swenn er sine stvnde .
0,24 niht baz bewenden chvnde .
0,25 daz er ovch tihtens pflac .
0,26 daz man gerne hoeren mac .
0,27 da chert er sinen fliz an .
0,28 er was genant Hartman .
0,29 vn- was ein ovwaere .
0,30 der tihte diz maere .
0,31 Ez het der kvnech Artus .
0,32 ze karidol in sin hvs .
0,33 z einen pfingesten geleit .
0,34 nach richer gewonheit .
0,35 eine also schoene hochzit .
0,36 daz er da vor noch sit .
0,37 deheine schoener nie gewan .
0,38 de is war da was ein boeser man .

0,39 in vil swachem werde .
0,40 vvande sich gesamenten vf der erde .
0,41 Bi niemens ziten anderswa .
0,42 So manech gvot riter als da .
0,43 ouch wart in da ze lone gegeben .
0,44 in allen wis ein wunschlebn .
0,45 in liebet den hof vn- den lip .
0,46 manech magt vn- wip .
0,47 die schoensten von den richen .
0,48 mich iamert waerlichen .
0,49 vn- hvlf ez iht ich wold ez clagen .
0,50 daz nv bi vnsern tagen .
0,51 Selch frevde niemer werden mac .
0,52 der man ze den ziten pflac .
0,53 doch mvzzen wir ovch nv genesn .
0,54 ich n wolde do niht sin gewesn .
0,55 daz ich nv niht en waere .
0,56 da vns noch mit ir maere .
0,57 So rehte wol wesn sol .
0,58 da taten in div werch vil wol .
0,59 ARtvs vn- div kvnegin .
0,60 ir ietwederz vnder in .
0,61 Sich vf ir aller willen fleiz .
0,62 do man des pfingestages enbeiz .
0,63 maenneclich im die frevde nam .
0,64 der in do allerbeste gezam .
0,65 dise sprachen wider div wip .
0,66 dise banechten den lip .
0,67 dise tanzten . dise svngen .
0,68 dise lieffen dise sprvngen .
0,69 dise horten seitspil .
0,70 dise schvozzen zuo dem zil .
0,71 dise redten von seneder arbeit .
0,72 dise von manheit .
0,73 Gawein ahte vmbe wafen .
0,74 Key legte sich slafen .
0,75 vf den sal vnder in .
0,76 ze gemache ane ere stvont sin sin .
0,77 Der kvnech vn- div kvnegin .
0,78 die heten sich ovch vnder in .
0,79 ze handen gevangen .
0,80 vn- waren ensamt gegangen .
0,81 in eine chemnaten da .
0,82 vn- heten sich slafen sa .
0,83 mer dvrch geselleschaft geleit .
0,84 danne dvrch deheine tracheit .
0,85 Si entslieffen beidiv schiere .
0,86 do gesazen riter viere .

0,87 dodines vn- Gawein .
 0,88 Segremors vn- ywein .
 0,89 ovch was gelegen da bi .
 0,90 der zvhtlose Key .
 0,91 vzzerhalp bi der want .
 0,92 der sehste was Kalogreant .
 0,93 der begvnde in sagen ein maere .
 0,94 von grozzer siner swaere .
 0,95 vn- von deheiner siner frvomcheit .
 0,96 do er noch lvtzel het geseit .
 0,97 do erwachte div kvnegin .
 0,98 vn- horte sin sagen hin in .
 0,99 Si lie ligen den kvnech ir man .
 0,100 vn- stal sich von im dan .
 0,101 vn- gesleich zvo in so lise dar .
 0,102 daz es ir deheiner wart gewar .
 0,103 vnz si in chom vil nahen bi .
 0,104 vn- viel enmitten vnder si .
 0,105 nivwan eine Kalogreant .
 0,106 der spranch engegen ir vf zehant .
 0,107 er neic ir vn- enpfie si .
 0,108 do erzeicte aber Key .
 0,109 Sin alte gewonheit .
 0,110 im was des mannes ere leit .
 0,111 vn- bervoft in dr vmbe sere .
 0,112 vn- sprach im an sin ere .
 0,113 er sprach “herre Kalogreant .
 0,114 vns was ovch e daz wol erchant .
 0,115 daz vnder vns niemen waere .
 0,116 So hofssch vn- als erbaere .
 0,117 als ir waent daz ir sit .
 0,118 des lazen wir iv den strit .
 0,119 vor allen iwwern gesellen .
 0,120 ob wir selbe wellen .
 0,121 ivch dvnchet des man svl n iv lan .
 0,122 ovch sol z min frowe da fvr han .
 0,123 Si taete iv anders gewalt .
 0,124 ivwer zvht ist so manecfalt .
 0,125 vn- ir dvnchet ivch so volchomen .
 0,126 de is war ir habt ivch an genomen .
 0,127 ir n wizzet hivte waz .
 0,128 vnser deheiner was so laz .
 0,129 het er die kvnegin ersehn .
 0,130 im en waere div selbe zvht geschehn .
 0,131 div da iv einem geschach .
 0,132 Sit vnser deheiner si ne sach .
 0,133 ode swie wir des vergazen .
 0,134 daz wir stille gesazen .

0,135 do moht ovch ir gesezzen sin .”
0,136 des antwuort im div kvnegin .
0,137 Si sprach “Key daz ist din site .
0,138 vn- en schadest niemen me da mite .
0,139 danne dv dir selbem tvost .
0,140 daz dv den iemer hazzen mvost .
0,141 dem dehein ere geschiht .
0,142 dv erlast dins nides niht .
0,143 daz gesinde noch die geste .
0,144 der boeste ist dir der beste .
0,145 vn- der beste der boeste .
0,146 eins dinges ich dich troeste .
0,147 daz man dir z iemer wol v’treit .
0,148 daz chvomt von diner gewonheit .
0,149 daz dv s die boesen alle erlast .
0,150 vn- daz dv haz ze den frvomen hast .
0,151 din schelten ist ein prisen .
0,152 vvider alle die wisen .
0,153 dv ne hetest diz gesprochen .
0,154 dv waerest benamen zebrochen .
0,155 vn- waere daz weiz got vil wol .
0,156 vvan dv bist bitters eiters vol .
0,157 da din herze inne swebt .
0,158 vn- wider din ere strebt .”
0,159 Key den zorn niht vertrvoc .
0,160 er sprach “frovwe es ist gnvoc .
0,161 ir habt mir s ovch ze vil gesagt .
0,162 vn- het ir s ein teil verdagt .
0,163 daz zaeme ivwerm namen wol .
0,164 ich enpfawe gerne als ich sol .
0,165 ivwer zvht vn- ivwer meisterschaft .
0,166 doch hat si alze grozze kraft .
0,167 ir sprechet alze sere .
0,168 den ritern an ir ere .
0,169 vvir waren s an iv vngewon .
0,170 ir werdet vnwert der von .
0,171 ir strafet mich als einen kneht .
0,172 Gnade ist bezzer danne reht .
0,173 ich n han iv selhes niht getan .
0,174 ir n moht mich wol lebn lan .
0,175 vn- waere min schulde grozzer iht .
0,176 So belibe mir der lip niht .
0,177 frovwe habt gnade min .
0,178 vn- lat sus grozzen zorn sin .
0,179 ivwer zorn ist vngnaedeclich .
0,180 niene brechet ivwer zvht dvrch mich .
0,181 min laster wil ich vertragen .
0,182 daz ir rvochet gedagen .

0,183 ich chvom nach minen schvlden .
0,184 Gerne ze sinen hvlden .
0,185 nv bit in sin maere .
0,186 des e begvnnen waere .
0,187 dvrch ivwer liebe volsagen .
0,188 man mac vil gerne vor iv dagen .”
0,189 Svs antwuorte Calogreant .
0,190 “ez ist vmbe ivch so gewant .
0,191 daz iv daz niemen merchen sol .
0,192 Sprechet ir anders danne wol .
0,193 mir ist ein dinch wol kvnt .
0,194 ez n sprichet niemens mvnt .
0,195 vvan als in sin herce leret .
0,196 Swen ivwer zvnge vneret .
0,197 da ist daz herze schvldech an .
0,198 in der werlde ist manech man .
0,199 falsch vn- wandelbaere .
0,200 der gerne biderbe waere .
0,201 vvan daz in sin herze en lat .
0,202 Swer ivch mit lere bestat .
0,203 de ist ein verlorniv arbeit .
0,204 ir n svlt ivwer gewonheit .
0,205 dvrch niemen zebrechen .
0,206 der hvmbel der sol stechen .
0,207 ovch ist reht daz der mist .
0,208 Stinche swa der ist .
0,209 der hvrnvz der sol diezzen .
0,210 ich n mohte niht geniezzen .
0,211 iwwers lobes noch ivwer frivntschaft .
0,212 vvan ivwer rede hat niht kraft .
0,213 ovch en wil ich nicht engelten .
0,214 Swaz ir mich mvgt geschelten .
0,215 vvar vmbe solt ir mich s erlan .
0,216 ir habt ez tivrem man getan .
0,217 doch sol man ze dirre zit .
0,218 vn- iemer mere swa ir sit .
0,219 mines sagens enbern .
0,220 min frovwe sol mich des gewern .
0,221 daz ich s mit ir hvlden vber si .”
0,222 do sprach der herre Key .
0,223 “Nv en lat disen herren .
0,224 mine schvlde niht gewerren .
0,225 wan die ne hant wider ivch niht getan .
0,226 min frovwe sol ivch niht erlan .
0,227 ir n sagt ivwer maere .
0,228 vvan ez niht reht waere .
0,229 engvlt en si alle min .”
0,230 do sprach div kvnegin .

0,231 "Herre Calogreant .
0,232 nv ist iv selbem wol erchant .
0,233 vn- sit gewahsen da mite .
0,234 daz in sine boesen site .
0,235 vil ofte hant enteret .
0,236 vn- daz sich niemen cheret .
0,237 an deheinen sinen spot .
0,238 ez ist min bet vn- min gebot .
0,239 daz ir sagt ivwer maere .
0,240 vvan ez sin frevde waere .
0,241 het er uns der rede erwant ."
0,242 do sprach Calogreant .
0,243 Swaz ir gebiet daz ist getan .
0,244 Sit ir mich s niht welt erlan .
0,245 So vernemt mit gvotem site .
0,246 vn- miet mich da mite .
0,247 ich sag iv deste gerner vil .
0,248 ob man z ze rehte merchen wil .
0,249 man verlivset michel sagen .
0,250 man en well ez merchen vn- dagen .
0,251 maniger bivt div oren dar .
0,252 er n nem es ovch mit dem hercen war .
0,253 So ne wirt im nivwan der doz .
0,254 vn- ist der schade alze groz .
0,255 vvan si verliesent beide ir arbeit .
0,256 der da hoeret vn- der da seit .
0,257 ir mvgt mir deste gerner dagen .
0,258 vvan ich n wil iv deheine lvoge sagen .
0,259 Ez geschach mir da von ist ez war .
0,260 ez sint nv wol zehn iar .
0,261 daz ich nach aventivre reit .
0,262 Gewafent nach gewonheit .
0,263 ze Brezzilian in den walt .
0,264 da waren die wege manecfalt .
0,265 do chert ich nach der zeswen hant .
0,266 vf einen stic den ich da vant .
0,267 der was vil rvch vn- enge .
0,268 dvrch dorne vn- dvrch gedrenge .
0,269 So fvor ich allen einen tac .
0,270 daz ich fvr war wol sprechen mac .
0,271 daz ich so grozze arbeit .
0,272 nie von vngeverte erleit .
0,273 vn- do ez an den abent gienc .
0,274 einen stic ich do gevienc .
0,275 der trvoc mich vz der wilde .
0,276 vn- chom an ein gevilde .
0,277 dem volget ich eine wile .
0,278 niht vol eine mile .

0,279 vnz daz ich eine bvrch ersach .
0,280 dar cherte ich do dvrch min gemach .
0,281 Svs reit ich gein dem bvrge tor .
0,282 da stvont ein riter vor .
0,283 er het den ich da stende vant .
0,284 einen mvzzerhabech vf siner hant .
0,285 diz was des hvses herre .
0,286 vn- als er mich von verre .
0,287 zvo im sach riten .
0,288 nv ne moht er niht erbiten .
0,289 vn- en lie mir niht der mvozze .
0,290 daz ich zvo sinem grvozze .
0,291 vollecliche waere chomen .
0,292 er n het mir e genomen .
0,293 den zovm vn- den stegereif .
0,294 vn- als er mich also begreif .
0,295 do enpfien er mich schone .
0,296 als im got iemer lone .
0,297 Nv hienc ein tavel vor dem tor .
0,300 an zwein cheten enbor .
0,301 da slvoc er an daz ez erhal .
0,302 vn- daz ez in die bvrch erschall .
0,303 dar nach was vil vnlanch .
0,304 vnz daz dort her fvr spranc .
0,305 des wirtes samnvnge .
0,306 Schoene vn- ivnge .
0,307 ivncherren vn- knehte .
0,308 Geleit nach ir rehte .
0,309 die hiezzen mich willechomen sin .
0,310 mins rosses vn- min .
0,311 vvar vil gvot war genomen .
0,312 vn- vil schiere sach ich chomen .
0,313 do ich in die bvrch gie .
0,314 eine ivnchfrovwen div mich enpfie .
0,315 Ich gihe noch als ich do iach .
0,316 daz ich nie schoener kint gesach .
0,317 div entwafent mich .
0,318 vn- einen schaden clagt ich .
0,319 des n wunder niemen .
0,320 daz der wafenriemen .
0,321 also rehte lvtzel ist .
0,322 daz si niht lenger frist .
0,323 mit mir solde vmbe gan .
0,324 ez was ze schiere getan .
0,325 ich n rvochte vn- sold ez iemer sin .
0,326 ein scharlaches maentelin .
0,327 daz gap si mir an .
0,328 ich vnsaeliger man .

0,329 daz si min ovge ie gesach .
0,330 do vns ze scheiden geschach .
0,331 Wir zwei beliben eine .
0,332 nv verstvont sich wol div reine .
0,333 daz ich gerne bi ir was .
0,334 an ein daz schoenste gras .
0,335 daz div werlt ie gewan .
0,336 da fvorte si mich an .
0,337 ein wenech von den livten baz .
0,338 daz liez ich weiz got ane haz .
0,339 hie vant ich wisheit bi der ivgent .
0,340 Grozze schoene vn- ganze tvgent .
0,341 Si saz mir gvtlichen bi .
0,342 vn- swaz ich sprach daz horte si .
0,343 vn- antwuort es mit gvete .
0,344 ez n betwanch min gemvete .
0,345 noch bechvombert minen lip .
0,346 nie so sere magt noch wip .
0,347 vn- getvot ovch lihte niemer me .
0,348 ov we iemer vn- ov we .
0,349 vvaz mir do frevden benam .
0,350 ein bot der von dem wirte quam .
0,351 der hiez vns beidiv ezzen gan .
0,352 do mvose ich frevde vn- rede lan .
0,353 do ich mit ir ze tische gienc .
0,354 der wirt mich anderstvont enpfienç .
0,355 ez n gebot nie wirt mere .
0,356 Sinem gaste grozzer ere .
0,357 er tet den stigen vn- den wegen .
0,358 vil manigen gvetlichen segen .
0,359 die mich gewiset heten dar .
0,360 hie mit vbergvldet er z gar .
0,361 daz er mich ir nie verstiez .
0,362 vn- mich so gvetlichen liez .
0,363 mit der ivnchfrovwen ezzen .
0,364 ovch en wart da niht vergezzen .
0,365 vvir ne heten alles des die kraft .
0,366 daz man da heizzet wirtschaft .
0,367 Man gap vns spise div was gvot .
0,368 da zvo den willigen mvot .
0,369 Do wir mit frevden gazen .
0,370 vn- da nach gesazen .
0,371 vn- ich im daz het geseit .
0,372 daz ich nach aventivre reit .
0,373 des wundert in vil sere .
0,374 vn- iach daz im nie mere .
0,375 dehein der gast waere chomen .
0,376 von dem er daz het v'nomen .

0,377 daz er aventivre svochte .
0,378 vn- bat daz ich des gervochte .
0,379 Swenne ich den wec da wider rite .
0,380 daz ich in danne niene mite .
0,381 da wider het ich deheinen strit .
0,382 ich lobt ez vn- leist ez sit .
0,383 Do slafens zit wart .
0,384 do gedaht ich an mine vart .
0,385 vn- do ich niene wolde .
0,386 noch beliben solde .
0,387 do wart der riterlichen magt .
0,388 von mir gnade gesagt .
0,389 ir gvoten handelvnge .
0,390 div svezze vn- div ivnge .
0,391 div lachet vn- neic mir .
0,392 Seht do mvose ich von ir .
0,393 daz gesinde bevalch ich got .
0,394 ze mins wirtes gebot .
0,395 da bot ich mich vil ofte zvo .
0,396 dannen schiet ich vn- reit vil frvo .
0,397 ze walde von gevilde .
0,398 da ramt ich der wilde .
0,399 vn- vant nach mitten morgen .
0,400 in dem walde verborgen .
0,401 ein breitez gerivte .
0,402 ane die livte .
0,403 da gesach ich mir vil leide .
0,404 eine swaere ovgenweide .
0,405 aller der tiere hande .
0,406 die man mir ie genande .
0,407 vehten vn- ringen .
0,408 mit eislichen dingen .
0,409 da vahten mit grimme .
0,410 mit grivlicher stimme .
0,411 vvisent vn- vrrinder .
0,412 do gehabt ich hinder .
0,413 vn- rov mich daz ich dar was chom- .
0,414 vn- heten si min war genomen .
0,415 So ne trivwet ich mich anders niht erwern .
0,416 vvan ich bat mich got nern .
0,417 von in wolt ich gerne dan .
0,418 do gesach ich sitzen einen man .
0,419 in almitten vnder in .
0,420 daz getroste mir den sin .
0,421 do ich im aber naher quam .
0,422 vn- ich sin rehte war genam .
0,423 do forht ich in also sere .
0,424 Sam div tier ode mere .

0,425 Sin menschlich bilde .
0,426 vvas anders harte wilde .
0,427 er was eine- more gelich .
0,428 michel vn- als eislich .
0,429 daz ez niemen gelovbet .
0,430 z ware im was sin hovbet .
0,431 Grozzer danne einem vre .
0,432 ez het der gebvre .
0,433 ein ragendez har rvozvar .
0,434 daz was im vaste vn- gar .
0,435 verwalchen zvo der swarte .
0,436 an hovpte vn- an barte .
0,437 Sin antlvtze was wol ellenbreit .
0,438 mit grozzen rvnzen beleit .
0,439 ovch waren im div oren .
0,440 als einem walttoren .
0,441 vermieset z ware .
0,442 mit spannelangem hare .
0,443 Breit als ein wanne .
0,444 dem vngefvegen manne .
0,445 vvaren gran vn- bra .
0,446 Lanch . rvch . vn- gra .
0,447 div nase als einem ohsen groz .
0,448 kvrz . wit . niender bloz .
0,449 daz antlvze dvrrer vn- flach .
0,450 ov wi wie eisliche er sach .
0,451 div ovgen rot zornvar .
0,452 der mvnt het im gar .
0,453 Bedenthalp den wangen .
0,454 mit wite bevangen .
0,455 er was starch vn- gezan .
0,456 als ein eber niht als ein man .
0,457 vzzeralp des mvndes tvr .
0,458 da ragten si her fvr .
0,459 Lanch . scharpf . groz . breit .
0,460 im was dez hovpt so geleit .
0,461 daz im sin rvhez kinnebein .
0,462 Gewahsen zvo den brvsten schein .
0,463 Sin rvoke was im vf gezogen .
0,464 hoveroht vn- vz gebogen .
0,465 er trvoc an seltsaeniv cleit .
0,466 zwo hivte het er an geleit .
0,467 die het er in nivwen stvnden .
0,468 zwein tieren abe geschvnden .
0,469 er trvoc einen kolben als groz .
0,470 daz mich da bi im verdroz .
0,471 Do ich im so nahen quam .
0,472 daz er min wol war genam .

0,473 zehant sach ich in vf stan .
0,474 vn- nahen zvo mir gan .
0,475 vveder wider mich sin mvot .
0,476 vvaere boese ode gvot .
0,477 des n weste ich niht die warheit .
0,478 vn- was iedoch ze wer bereit .
0,479 vveder er n sprach noch ich .
0,480 do er sweic do versach ich mich .
0,481 daz er ein stvmme waere .
0,482 vn- bat mir sagen maere .
0,483 ich sprach “bist v vbel ode gvot .”
0,484 er sprach “swer mir niene tvot .
0,485 der sol ovch mich ze frivnde han .”
0,486 “maht v mich danne wizzen lan .
0,487 vvaz creativre bist v .”
0,488 “ein man als dv gesihest nv .”
0,489 “nv sage mir waz din ampt si .”
0,490 “da sten ich disen tieren bi .”
0,491 “nv sage mir tvont si dir iht .”
0,492 “Si lobten z taete ich in niht .”
0,493 “entrivwen fvrhtent si dich .”
0,494 “ich pflige ir vn- si fvrhtent mich .
0,495 als ir meister vn- ir herren .”
0,496 “Sage waz mac in gewerren .
0,497 din meisterschaft vn- din hvote .
0,498 Si ne lovffen nach ir mvote .
0,499 ze walde vn- ze gevilde .
0,500 vvan ich sihe wol si sint wilde .
0,501 Si ne erchennent man noch sin gebot .
0,502 ich n wande niht daz ane got .
0,503 der gewalt iemen tohte .
0,504 der si betwingen mohte .
0,505 ane sloz vn- ane bant .”
0,506 ER sprach “min zvnge vn- min hant .
0,507 min bet vn- min dro .
0,508 die hant mir si gemachet so .
0,509 daz si bibende vor mir stant .
0,510 vn- dvrch mich tvont vn- lant .
0,511 Swer ovch anders vnder in .
0,512 Solde sin als ich bin .
0,513 der waere schiere verlorn .”
0,514 “herre fvrhtent si dinen zorn .
0,515 So gebivt in fride her ze mir .”
0,516 er sprach “niene fvrhte dir .
0,517 Si ne tvont dir bi mir dehein leit .
0,518 nv han ich dir vil gar geseit .
0,519 Swes dv gervochtest fragen .
0,520 nv ne sol dich niht betragen .

0,521 dv ne sagest mir waz dv svochest .
0,522 ob dv iht von mir gervochest .
0,523 daz ist allez getan .”
0,524 ich sprach “ich wil dich z wizzen lan .
0,525 ich svoche aventivre .”
0,526 do sprach der vngehivre .
0,527 “aventivre waz ist daz .”
0,528 “daz wil ich dir bescheiden baz .
0,529 Nv sich wie ich gewafent bin .
0,530 ich heizze ein riter vn- han den sin .
0,531 daz ich svochende rite .
0,532 einen man der mit mir strite .
0,533 vn- der gewafent si als ich .
0,534 daz priset in vn- sleht er mich .
0,535 Gesige aber ich im an .
0,536 So hat man mich fvr einen man .
0,537 vn- wurde werder danne ich si .
0,538 Si dir nv verre ode bi .
0,539 chvnt vmbe selhe wage iht .
0,540 daz verswic mich niht .
0,541 vn- wise mich dar .
0,542 vvand ich nach anders niene var .”
0,543 Alsvs antwuort er mir do .
0,544 “Sit din gemvete stet also .
0,545 daz dv nach vngemache strebest .
0,546 vn- niht gerne sanfte lebest .
0,547 ich n gehorte bi minen tagen .
0,548 Selhes nie niht gesagen .
0,549 vvaz aventivre waere .
0,550 doch sag ich dir ein maere .
0,551 vvil dv den lip wagen .
0,552 So ne darft v niht me fragen .
0,553 hie ist ein brvnne nahen bi .
0,554 vber kvrzer mile dri .
0,555 z ware vn- chvomes tv dar .
0,556 vn- tvost v im sin reht gar .
0,557 vn- tvost v die widerchere .
0,558 ane grozze din vnere .
0,559 So bist v wol ein frvom man .
0,560 da ne zwifel ich niht an .
0,561 vvaz frvomt ob ich dir mer sage .
0,562 ich weiz wol vn- bist v niht ein zage .
0,563 So gesihes tv wol in kvrzer frist .
0,564 Selbe waz div rede ist .
0,565 Noch hoere waz sin reht si .
0,566 da stet ein kapel bi .
0,567 div ist schoene vn- aber chleine .
0,568 kalt vn- vil reine .

0,569 ist der selbe brvne .
0,570 in rveret regen noch svnne .
0,571 noch en trvebent in die winde .
0,572 des schirmet im ein linde .
0,573 daz nie man schoener gesach .
0,574 div ist sin schat vn- sin dach .
0,575 Si ist breit . hoch . vn- als diche .
0,576 daz regen noch der svnnen bliche .
0,577 niemer dar dvrch en chvomt .
0,578 ir n schadet der winder noch n frvomt .
0,579 an ir schoene niht ein har .
0,580 Si ne ste gelovbet dvrch daz iar .
0,581 vn- ob dem brvne stet ein .
0,582 harte zierlicher stein .
0,583 vndersazt mit vieren .
0,584 marmelinen tieren .
0,585 der ist gelochert vaste .
0,586 ez hanget von einem aste .
0,587 von golde ein beche her abe .
0,588 ia ne waen ich niht daz iemen habe .
0,589 dehein bezzer golt danne ez si .
0,590 div cheten da ez hanget bi .
0,591 div ist vz silber geslagen .
0,592 vvil dv danne niht verzagen .
0,593 So ne tvo dem beche niht me .
0,594 Givz vf den stein der da ste .
0,595 da mit des brvne ein teil .
0,596 de is war so has tv gvot heil .
0,597 Gescheides tv mit eren dan .”
0,598 hin wiste mich der waltman .
0,599 einen stic ze der winstern hant .
0,600 ich fvor des endes vn- vant .
0,601 der rede eine warheit .
0,602 als er mir het geseit .
0,603 ich vant da groz ere .
0,604 man gehoeret niemer mere .
0,605 div werlt ste kvrz ode lanc .
0,606 So wunneclichen vogelsanc .
0,607 als ich ze der linden vernam .
0,608 do ich der zvo geriten quam .
0,609 Der ie gewesn waere .
0,610 ein totrivwesaere .
0,611 des herce waere da gefrevt .
0,612 Si was mit vogeln bestrevt .
0,613 daz ich der este schin verlos .
0,614 vn- ovch des lovbes lvtzel chos .
0,615 der ne waren zwene niender gelich .
0,616 ir gesanch was als mislich .

0,617 hoch vn- nider .
0,618 die stimme gap in wider .
0,619 mit gelichem galme der walt .
0,620 vwie da sanch gesange galt .
0,621 den brvnnen ich dar vnder sach .
0,622 vn- swes mir der waltman v'iach .
0,623 ein smareides was der stein .
0,624 vz iegelichem orte schein .
0,625 ein als gelpfer rvbin .
0,626 der morgensterne mohte sin .
0,627 niht schoener swenn er vf gat .
0,628 vn- in des lvoftes trvebe lat .
0,629 Do ich daz beche hangende vant .
0,630 do gedaht ich des zehant .
0,631 Sit ich nach aventivre reit .
0,632 ez waere ein vnmanheit .
0,633 ob ich do daz verbaere .
0,634 ich n versvochte waz ez waere .
0,635 vn- riet mir min vnwiser mvot .
0,636 der mir vil ofte schaden tvot .
0,637 daz ich goz vf den stein .
0,638 do erlasch div svnne div e schein .
0,639 vn- zergie daz vogelsanc .
0,640 als ez ein swaerez weter twanc .
0,641 div wolchen begvnden .
0,642 in den selben stvnden .
0,643 in vier enden vf gan .
0,644 der liechte tac wart getan .
0,645 daz ich die linden chvme gesach .
0,646 Groz vngnade hie geschach .
0,647 vil schiere do gesach ich .
0,648 in allen enden vmbe mich .
0,649 vvol tvsent tvsent bliche .
0,650 dar nach slvoc als diche .
0,651 ein als kreftiger donreslac .
0,652 daz ich vf der erde gelac .
0,653 Sich hvop ein hagel vn- ein regen .
0,654 vvan daz mich der gotes segen .
0,655 friste von des weters not .
0,656 ich waere der wile diche tot .
0,657 daz weter wart als vngemach .
0,658 daz ez den walt nider brach .
0,659 vvas iender ein bovm da so groz .
0,660 der da bestvont der wart so bloz .
0,661 vn- des lovbes als laere .
0,662 als er verbrvnnen waere .
0,663 Swaz lebte in dem walde .
0,664 ez entrvnne danne balde .

0,665 daz was da zehant tot .
0,666 ich het von des wetters not .
0,667 mich des libes begeben .
0,668 vn- ahte niht vf min lebn .
0,669 vn- waere ovch svnder zwifel tot .
0,670 vvan daz der hagel vn- div not .
0,671 in kvrzer wile gelac .
0,672 vn- begynde lichten der tac .
0,673 Do disiv freise zergienc .
0,674 vn- ze weter gevienc .
0,675 waere ich gewesn fvr war .
0,676 Bi dem brvnnen cehn iar .
0,677 ich n begvzze in niemer me .
0,678 vvan ich het ez baz gelazen e .
0,679 die vogel chomen wider .
0,680 ez wart von ir gevider .
0,681 div linde anderstvnt bedaht .
0,682 Si hvoben aber ir svezzen braht .
0,683 vn- svngen verre baz danne e .
0,684 mir ne wart da vor nie so we .
0,685 des n waere nv vergezzen .
0,686 alsvs het ich besezzen .
0,687 daz ander paradyse .
0,688 die selben freude ich prise .
0,689 fvr alle die ich ie gesach .
0,690 ia wand ich freude ane vngemach .
0,691 vnangestlichen iemer han .
0,692 Seht do trovc mich min wan .
0,693 Mir nahte laster vn- leit .
0,694 nv seht wa dort her reit .
0,695 ein riter des geverte .
0,696 vvas grimme vn- als herte .
0,697 daz ich des wande ez waere ein her .
0,698 iedoch bereite ich mich ze wer .
0,699 Sin ros was starch er selbe groz .
0,700 des ich vil lvtzel da genoz .
0,701 Sin stimme lvte sam ein horn .
0,702 ich sach wol im was vf mich zorn .
0,703 als ab ich in einen sach .
0,704 min forhte vn- min vngemach .
0,705 vvalt gesenftet iedoch .
0,706 vn- gedahte ze leben noch .
0,707 vn- gvorte minem rosse baz .
0,708 do ich wider dar vf gesaz .
0,709 do was er chomen daz er mich sach .
0,710 vil lvte rief er vn- sprach .
0,711 do er mich allerverrest chos .
0,712 “Riter ir sit trivwelos .

0,713 Mir ne wart von iv niht widerseit .
0,714 vn- habt mir lasterlichez leit .
0,715 in ivwer hochfart getan .
0,716 nv wie sihe ich minen walt stan .
0,717 den habt ir mir verderbet .
0,718 vn- min wilt ersterbet .
0,719 vn- min gefvgel veriagt .
0,720 iv si von mir widersagt .
0,721 ir svlt es bvozze bestan .
0,722 ode ez mvoz mir an den lip gan .
0,723 daz chint daz da ist geslagen .
0,724 daz mvoz wol weinen vn- clagen .
0,725 alsvs clag ich von schvlden .
0,726 ich n han wider ivwern hvlden .
0,727 mit minen wizzen niht getan .
0,728 ane schvlde ich grozzen schaden han .
0,729 hie ne sol niht frides mere wesn .
0,730 vvert ivch ob ir welt genesn .”
0,731 Do bot ich min vnschvlde .
0,732 vn- svochte sine hvlde .
0,733 wan er was merre danne ich .
0,734 do ne sprach er niht wider mich .
0,735 vvan daz ich mich werte .
0,736 ob ich mich gerne nerte .
0,737 do tet ich daz ich mohte .
0,738 daz mir doch lvtzel tohte .
0,739 ich tiostierte wider in .
0,740 des fvort er ovch min ros hin .
0,741 daz beste heil daz mir geschach .
0,742 daz was daz ich min sper zebrach .
0,743 vil schone sazte mich sin hant .
0,744 hinder daz ros vf den sant .
0,745 daz ich vil gar des vergaz .
0,746 ob ich vf ros ie gesaz .
0,747 er nam min ros vn- lie mich ligen .
0,748 mir was gelvoches da verzigen .
0,749 doch en mvete mich niht so sere .
0,750 er n bot mir nie die ere .
0,751 daz er mich het an gesehn .
0,752 do im div ere was geschehn .
0,753 do gebart er rehte dem gelich .
0,754 als im allertaegelich .
0,755 zehn stvnt geschaehe sam .
0,756 der pris was sin vn- min div scham .
0,757 Swaz ich doch lasters da gewan .
0,758 da was ich vnschvldech an .
0,759 mir was der wille harte gvot .
0,760 do ne mohten mir div werch den mvot .

0,761 an im niht volbringen .
0,762 des mvoſe mir miſſelingen .
0,763 Do mir des roſſes wart v'zigen .
0,764 ich n mohte niht iemer da geligen .
0,765 do gervochte ich gen von dan .
0,766 als ein erloſer man .
0,767 vn- ſaz aber ze dem brvnnen .
0,768 der vnzvhte ſvlt ir mich v'chvnnen .
0,769 Swie nivgerne ich anders ſi .
0,770 vn- ſaezze ich iemer da bi .
0,771 ich n begvozze in niemer mere .
0,772 ich ngalt es e ſo ſere .
0,773 Do ich gnvoc lange da geſaz .
0,774 vn- betrahte daz .
0,775 waz mir ze tvonne waere .
0,776 min harnasch was ze ſwaere .
0,777 daz ich in gende niht mohte getragen .
0,778 nv waz mag ich iv mere ſagen .
0,779 vvan daz ich n abe ſchvotte vn- gie dan .
0,780 ich gnadeloſer man .
0,781 Gedachte war ich cherte .
0,782 vnz mich min herze lerte .
0,783 daz mir an minen wirt riet .
0,784 von dem ich des morgens ſchiet .
0,785 Swie ich dar chome gegangen .
0,786 ich n wart nie wirs enpfangen .
0,787 danne ovch des abendes do ich von im reit .
0,788 daz machte aber ſin hofscheit .
0,789 vvaere mir div ere geſchehn .
0,790 in dem laſter vn- ich wart geſehn .
0,791 min handelvnge waere gnvoc gvot .
0,792 Svs troſten ſi mir minen mvot .
0,793 er vn- min ivnchfrovwe .
0,794 daz ſi got iemer ſchovwe .
0,795 ich han einem toren gelich getan .
0,796 div maere der ich laſter han .
0,797 daz ich ivch div niht chan verdagen .
0,798 ich n wolt es ovch e nie geſagen .
0,801 Si ivwer deheinen geſchehn baz .
0,802 ob er nv welle der ſage ovch daz .
0,803 Do rechent der herre Iwein .
0,804 die kvnneſchaft vnder in zwein .
0,805 er ſprach “neve Calogreant .
0,806 ez richet von rehte min hant .
0,807 Swaz dir laſters iſt geſchehn .
0,808 ich wil ovch varn den brvnnen ſehn .
0,809 vn- waz wunders da ſi .”
0,810 do ſprach aber Key .

0,4818 [...] [...] Gvot spise vn- senfter slaf .
0,4819 div waren im bereit hie .
0,4820 vn- erwachte do der tac vf gie .
0,4821 er horte eine messe frvo .
0,4822 vn- bereite sich der zvo .
0,4823 als er kempfen wolde .
0,4824 den der da chomen solde .
0,4825 als er do niemen chomen sach .
0,4826 daz was im leit vn- sprach .
0,4827 “herre nv waer ich iv bereit .
0,4828 iv ist min dienst vnverseit .
0,4829 vva ist der da chomen sol .
0,4830 min biten chvomt mir niht wol .
0,4831 ich svme mich vil sere .
0,4832 ez get an alle mine ere .
0,4833 Swaz ich nv hie gebite .
0,4834 es ist zit daz ich rite .”
0,4835 Div dro tet in allen we .
0,4836 vn- wurden trvrech als e .
0,4837 vil mvelich was in ein dinc .
0,4838 Si ne westen niht welch gerinc .
0,4839 in allerbeste erte .
0,4840 der im den mvot becherte .
0,4841 der wirt bot im sin gvot .
0,4842 er sprach “so ne stat niht min mvot .
0,4843 daz ich dvrch gvotes miete .
0,4844 den lip veile biete .”
0,4845 vn- widersagt im daz gar .
0,4846 des wurden si harte rivwevar .
0,4847 der wirt vn- daz gesinde .
0,4848 div frowe mit ir kinde .
0,4849 ez wart vil diche von in zwein .
0,4850 Sin bester frivnt her Gawein .
0,4851 an der bet genant .
0,4852 vn- er bi im gemant .
0,4853 Si manten in also verre .
0,4854 daz got unser herre .
0,4855 im saelde vn- ere baere .
0,4856 der barmherze waere .
0,4857 erbarmet er sich vber si
0,4858 da ne stvende gotes lon bi .
0,4859 daz bewegt im den mvot .
0,4860 vvan er was biderbe vn- gvot .
0,4861 man sagt daz in betwnge .
0,4862 div tivre manvnge .
0,4863 do er ir dvrft rehte ervant .
0,4864 vn- im so ofte wart genant .
0,4865 Got vn- her Gawein .

0,4866 vvan swederm er vnder den zwein .
0,4867 Grozzern vnwillen trvoc .
0,4868 dem dient er gerne gnvoc .
0,4869 des wart sin mvot zwifelhaft .
0,4870 er gedahte “ich bedarf wol meisterschaft .
0,4871 Sol ich daz waegest ersehn .
0,4872 mir ist ze spilne geschehn .
0,4873 ein ze gach geteiltez spil .
0,4874 daz n giltet lvtzel noch vil .
0,4875 nivwan alle min ere .
0,4876 ich bedarf wol gvoter lere .
0,4877 vn- weiz wol swederz ich kivse .
0,4878 daz ich dar an verlivse .
0,4879 ich n mohte ir beider gepflegn .
0,4880 ode beidiv gelazen vnderwegn .
0,4881 ode doch daz eine .
0,4882 So waere min angest cleine .
0,4883 Svs weiz ich min deheinen rat .
0,4884 ich bin als ez mir nv stat .
0,4885 Gvneret ob ich rite .
0,4886 vn- geschendet ob ich bite .
0,4887 nv ne mag ich ir beider niht bestan .
0,4888 vn- getar ovch ir dewederz lan .
0,4889 nv gebe mir got gvoten rat .
0,4890 der mich vnz her geleitet hat .
0,4891 daz ich mich beidenthalp bewar .
0,4892 also daz ich rehte gevar .
0,4893 ich n wil benamen die niht lan .
0,4894 der mich e geheizzen han .
0,4895 vn- div ir angest vn- ir leit .
0,4896 nivwan von minen schvlden treit .
0,4897 Liezze ich si danne .
0,4898 vvie zaeme daz frvomen manne .
0,4899 doch waere div eine magt .
0,4900 harte schiere verclagt .
0,4901 vvider dem schaden der hie geschiht .
0,4902 Gieng ez mir an die trivwe niht .
0,4903 So waere ovch dirre wirt wol wert .
0,4904 der hie miner helfe gert .
0,4905 vn- des hern Gaweins swester vn- ir kint .
0,4906 div mir ze herzen gende sint .
0,4907 dvrch si selben vn- dvrch in .
0,4908 dem ich des wol schvldech bin .
0,4909 daz ich im niht des abe ge .
0,4910 daz im ze dienste geste .
0,4911 mvoz ich si vnderwegn lan .
0,4912 So habent si des iemer wan .
0,4913 daz ich des libes si ein zage .”

0,4914 Nv schiet den zwifel vn- die clage .
0,4915 der grozze rise des si biten .
0,4916 der chom dort zvo in geriten .
0,4917 vn- fvorte sine gefangen .
0,4918 an den het er begangen .
0,4919 Grozze vnhofscheit .
0,4920 in waren aller slahte cleit .
0,4921 ze den ziten fremde .
0,4922 nivwan div boesten hemde .
0,4923 div ie kvochenkneht getrvoc .
0,4924 Si treip ein getwerch daz si slvoc .
0,4925 mit siner geiselsvoten .
0,4926 daz si vil sere blvoten .
0,4927 die herren riten vngeschvoch .
0,4928 ir hemde was ein sactvoch .
0,4929 Gezerret swarz vn- groz .
0,4930 die edeln riter waren bloz .
0,4931 an beinen vn- an armen .
0,4932 den gast begvnde erbarmen .
0,4933 div grozze not die si liten .
0,4934 ir pfert waren div si riten .
0,4935 totmager vn- kranc .
0,4936 ietwederz strvchte vn- hanc .
0,4937 die fvezze waren in vnden .
0,4938 zesamne gebvnden .
0,4939 vn- die hende vaste .
0,4940 ze rvoke mit baste .
0,4941 den gvorren die si trvogen hin .
0,4942 den waren die zaegel vnder in .
0,4943 zesamne geflohten .
0,4944 daz si niene mohten .
0,4945 einander entwichen .
0,4946 do si so iaemerlichen .
0,4947 ir edel vater riten sach .
0,4948 daz do sin herce niene brach .
0,4949 vor iamer des wundert mich .
0,4950 vvand ez was wol iaemerlich .
0,4951 Svs fvort er si fvr daz bvrge tor .
0,4952 da horten si in rvofen vor .
0,4953 er hienge si alle viere .
0,4954 ob man si niht schiere .
0,4955 mit ir swester loste .
0,4956 Do sprach der si da troste .
0,4957 der riter der des levn pflac .
0,4958 “de is war herre ob ich mac .
0,4959 ich ledige vnser gesellen .
0,4960 Got sol disen vellen .
0,4961 er ist ein vnbescheiden man .

0,4962 mich sterchet vaste dar an .
0,4963 ivwer reht vn- sin hochfart .
0,4964 daz div ie so groz wart .
0,4965 er n chan sich lasters niht geschamen .
0,4966 daz er si ir gebvrt vn- ir namen .
0,4967 niht chan geniezzen lan .
0,4968 Swaz si im heten getan .
0,4969 ich n sol deheinen riter schelten .
0,4970 iedoch mvoz er engelten .
0,4971 Siner vngewizzenheit .
0,4972 de is war mag ich ez wirt im leit .”
0,4973 er het in kvrzen stvnden .
0,4974 den helm vf gebvnden .
0,4975 vn- was schiere bereit .
0,4976 daz lerte in div gewonheit .
0,4977 Sin ros sach er bi im stan .
0,4978 er hiez die brvoke nider lan .
0,4979 er sprach “diz sol sich scheiden .
0,4980 vnser einem ode vns beiden .
0,4981 nach schaden vn- nach schanden .
0,4982 ich getrvw es minen handen .
0,4983 daz ich sine dro genider .
0,4984 de is war er mvoz iv wider .
0,4985 ivwer svne gesvnde gebn .
0,4986 ode er benimt mir daz lebn .
0,4987 Swederz der sol geschehn .
0,4988 daz hat man schiere gesehn .”
0,4989 Svs was im an den risen gach .
0,4990 Sin lev volget im nach .
0,4991 do in der rise chomen sach .
0,4992 daz was sin spot vn- sprach .
0,4993 “ov we ir vil tvmber man .
0,4994 vvaz nemt ir ivch an .
0,4995 daz ir als vngerne lebt .
0,4996 vn- svs nach dem tode strebt .
0,4997 daz ist ein vnwiser rat .
0,4998 vn- swer iv den geraten hat .
0,4999 dem ist ivwer lebn leit .
0,5000 vn- wil sich mit der warheit .
0,5001 vil wol an iv gerochen han .
0,5002 als er ovch hat getan .
0,5003 er hat sich gerochen wol .
0,5004 vvand ich daz schiere schaffen sol .
0,5005 daz ir im niemer getvot .
0,5006 deweder vbel noch gvot .”
0,5007 Svs antwuorte her Iwein do .
0,5008 “Riter waz tovc disiv dro .
0,5009 Lat boese rede vn- tvot div werch .

0,5010 ode ich entsitze ein getwerch .
0,5011 harter danne iwwern grozzen lip .
0,5012 Lat schelten vngezogeniv wip .
0,5013 die ne mvgen niht gevehten .
0,5014 vn- wil sin vnser trehten .
0,5015 nach rehtem gerihte pflegn .
0,5016 So sit ir schiere gelegn .”
0,5017 nv het dem risen geseit .
0,5018 Sin kraft vn- sin manheit .
0,5019 vvaz im gewaefen tohte .
0,5020 vn- wer im geschaden mohte .
0,5021 in dvhte er het gewaefens gnvoc .
0,5022 an einer stangen die er trvoc .
0,5023 des frevte sich her Iwein .
0,5024 daz er als vngewafent schein .
0,5025 vnder den arm slvog er .
0,5026 mit gvotem willen daz sper .
0,5027 vn- nam daz ors mit den sporn .
0,5028 er het in vf die brvst erhorn .
0,5029 vn- stach im einen selhen stich .
0,5030 daz daz ysich sich .
0,5031 Loste von dem schafte .
0,5032 vn- im in dem libe hafte .
0,5033 ovch slvoc im der rise einen slac .
0,5034 daz ich iv daz wol sagen mac .
0,5035 het in daz ros niht fvr getragen .
0,5036 daz er im het geslagen .
0,5037 noch einen slac als er do slvoc .
0,5038 es waere ze dem tode gnvoc .
0,5039 do trvoc in daz ros dan .
0,5040 vnz daz er daz swert gewan .
0,5041 Sa chert er wider vf in .
0,5042 vn- gestivrte in des sin sin .
0,5043 Sin kraft vn- sin manheit .
0,5044 do er wider vf in reit .
0,5045 daz er im eine wunden slvoc .
0,5046 do in daz ros fvr trvoc .
0,5047 do slvoc der rise im einen slac .
0,5048 daz er gestracter lac .
0,5049 vf dem rosse fvr tot .
0,5050 do ersach der lev sine not .
0,5051 vn- lief den vngefvegen man .
0,5052 vil harte zorneclichen an .
0,5053 vn- zarte im cleit vn- brat .
0,5054 als lanc so der rvoke gat .
0,5055 von den ahseln her abe .
0,5056 daz der vngefvege knabe .
0,5057 als ein ohse erlvote .

0,5058 do wancte div rvote .
0,5059 die er da ze wer trvoc .
0,5060 vn- do er nach dem levn slvoc .
0,5061 do entweich im der lev dan .
0,5062 vn- en traf den levn noch den man .
0,5063 ze dem slage wart im so gach .
0,5064 daz er sich neicte der nach .
0,5065 vn- vil nach der nider gelac .
0,5066 e er erzvoge den andern slac .
0,5067 do het sich her Iwein .
0,5068 mit vil grozzen wunden zwein .
0,5069 vil wol an im gerochen .
0,5070 vn- daz swert dvrch in gestochen .
0,5071 Rehte da daz herce lit .
0,5072 do was verendet der strit .
0,5073 vn- viel von der swaere .
0,5074 als ez ein bovm waere .
0,5075 Uon des risen valle .
0,5076 frevten si sich alle .
0,5077 den liebe dr an was geschehn .
0,5078 Si heten heiles ersehn .
0,5079 den riter der des levn pflac .
0,5080 vvande si lebten fvr den tac .
0,5081 ane angest vn- ane not .
0,5082 do der rise gelac tot .
0,5083 des gnadeten si gnvoc .
0,5084 dem hern Iwein der in slvoc .
0,5085 do gert er vrlovbes sa .
0,5086 vvand er n het sich da .
0,5087 niht ze svmen mere .
0,5088 ob er sin ere .
0,5089 an ir bestaeten wolde .
0,5090 der er da chomen solde .
0,5091 ze helfe vmbe mitten tac .
0,5092 div da dvrch in gevangen lac .
0,5093 do begynde in der wirt biten .
0,5094 daz waere als gvot vermiten .
0,5095 daz er da rvowen wolde .
0,5096 vvan er n mohte noch n solde .
0,5097 do antwuort er vn- sin wip .
0,5098 Beide gvot vn- lip .
0,5099 vil gar in sine gewalt .
0,5100 daz gnaden wart vil manecfalt .
0,5101 daz er da horte von in zwein .
0,5102 do sprach min her Iwein .
0,5103 “welt ir mich des geniezzen lan .
0,5104 ob ich iv iht gedient han .
0,5105 So tvot ein dinc des ich bite .

0,5106 da ist mir wol gelont mite .
0,5107 den herren Gawein minne ich .
0,5108 ich weiz wol als tvot er mich .
0,5109 ist vnser minne ane kraft .
0,5110 So ne wart nie gvot geselleschaft .
0,5111 den ernst sol ich im nivwen .
0,5112 Swa ich mac intrivwen .
0,5113 herre zvo dem ritet ir .
0,5114 vn- grvezzet in von mir .
0,5115 vn- fveret mit iv ivweriv kint .
0,5116 div da hie erlediget sint .
0,5117 daz ir swester mit in var .
0,5118 vn- fveret ovch daz getwerch dar .
0,5119 des herre hie ligt erslagen .
0,5120 ir svlt im des gnade sagen .
0,5121 Swaz ich iv hie gedient han .
0,5122 vvan daz ist gar dvrch in getan .
0,5123 frag er ivch wie ich si genant .
0,5124 So tvot im daz erchant .
0,5125 daz ein lev mit mir si .
0,5126 da erchennet er mich bi .”
0,5127 Daz gelobte der herre .
0,5128 vn- bat in vil verre .
0,5129 Swenn er zvo dem brvnnen gestrite .
0,5130 daz er dar wider rite .
0,5131 er schveffe im gvoten gemach .
0,5132 min her Iwein do sprach .
0,5133 “min riten daz ist mislich .
0,5134 ich chvom iv gerne lant si mich .
0,5135 mit den ich da striten sol .
0,5136 ich getrvwe aber in vil wol .
0,5137 mvgen si mir z abe erstriten .
0,5138 Si ne lant mich niender riten .”
0,5139 do bat da man vn- wip .
0,5140 daz got sin ere vn- sinen lip .
0,5141 friste vn- behvote .
0,5142 mit libe vn- mit gvote .
0,5143 Stvonden si im ze gebot .
0,5144 alsvs bavalch er si got .
0,5145 im waren die wege wol kvnt .
0,5146 vn- was ovch deste kvrzer stvnt .
0,5147 zvo der kapeln chomen .
0,5148 nv was div ivnchfrovwe genomen .
0,5149 her vz da si gevangen lac .
0,5150 vvand ez was wol vmbe mitten tac .
0,5151 nv waren ir in den stvnden .
0,5152 die hende gebvnden .
0,5153 ir cleider von ir getan .

0,5154 vn- nivwan ein hemde an verlan .
0,5155 vn- div hvort was bereit .
0,5156 vn- daz fivr dar vnder geleit .
0,5157 vn- stvont frov Lvnet .
0,5158 vf ir knien an ir gebet .
0,5159 vn- bat got der sele pflegn .
0,5160 vvan des libes het si sich bewegn .
0,5161 Do si sich missetroste .
0,5162 daz si nv niemen loste .
0,5163 do chom ir helfaere .
0,5164 vn- was im vil swaere .
0,5165 ir laster vn- ir arbeit .
0,5166 die si von sinen schvlden leit .
0,5167 ovch het min her Iwein .
0,5168 Grozzen trost ze den zwein .
0,5169 daz got vn- ir vnschvlde .
0,5170 den gewalt niene dvlde .
0,5171 daz im iht missegienge .
0,5172 vn- daz in ovch vervienge .
0,5173 der lev sin geverte .
0,5174 daz er die magt ernerte .
0,5175 nv gahte er sere mit den sporn .
0,5176 vvande si waere verlorn .
0,5177 vvaer er iht langer gewesn .
0,5178 er sprach "lat genesn .
0,5179 vbeliv diet dise magt .
0,5180 Swaz man vber si hie clagt .
0,5181 des wil ich in ir schvlden stan .
0,5182 vn- sol si da zvo kempfen han .
0,5183 So wil ich vehten fvr si ."
0,5184 do daz gehorten dise dri .
0,5185 daz versmahte in vaste .
0,5186 vn- entwichen doch dem gaste .
0,5187 vn- machten im wec dar .
0,5188 nv nam er vmbe sich war .
0,5189 vn- svochte si mit den ovgen .
0,5190 die sin herce tovgen .
0,5191 z allen ziten an sach .
0,5192 vn- ir ovch ze frovwen iach .
0,5193 Schiere sach er si sitzen .
0,5194 vn- was von sinen witzen .
0,5195 vil nach chomen als e .
0,5196 vvande si sagent ez tvo we .
0,5197 Swer sinem herzeliebe bi .
0,5198 als gastlichen si .
0,5199 nv begynd er vmbe schovwen .
0,5200 vn- sach vil ivnchfrovwen .
0,5201 die ir gesindes waren .

0,5202 die hort er gebaren .
0,5203 harte claelichen .
0,5204 vn- baten got den richen .
0,5205 Si sprachen "got herre .
0,5206 vvir biten dich vil verre .
0,5207 daz dv vns rechest an dem .
0,5208 der vns vnser gespiln nem .
0,5209 vvir heten ir frvom vn- ere .
0,5210 nv ne haben wir niemen mere .
0,5211 der da ze chemnaten .
0,5212 Getvrre vmbe vns geraten .
0,5213 daz vns min frowe iht gvotes tvo .
0,5214 als beide spate vn- frvo .
0,5215 div vil getrivwe Lvnet .
0,5216 vnser liebiv gespil tet ."
0,5217 Diz machte im den mvot .
0,5218 ze vehten starch vn- gvot .
0,5219 vn- reit dar da er si sach .
0,5220 er hiez si vf sten vn- sprach .
0,5221 "frowe zeiget mir die .
0,5222 die ivch da chvombernt sint si hie .
0,5223 vn- heizzet ivch balde ledech lan .
0,5224 ode si mvezzen von mir han .
0,5225 den strit den ich geleisten mac ."
0,5226 vn- sin lev der sin pflac .
0,5227 der gehorte schiere sinen haz .
0,5228 vn- trat ovch hin naher baz .
0,5229 Nv was div reine gvote magt .
0,5230 von forhten als gar verzagt .
0,5231 daz si vil chvme vf gesach .
0,5232 do gevie si kraft vn- sprach .
0,5233 "herre daz vergelt iv got .
0,5234 der weiz wol daz ich disen spot .
0,5235 vn- dise schande dvlde .
0,5236 ane alle mine schvlde .
0,5237 vn- bit vnsern herren .
0,5238 daz si iv mvezzen werren .
0,5239 nivwan als ich schvldech si ."
0,5240 vn- zeicte si im alle dri .
0,5241 Do sprach der trvhsaezze .
0,5242 "er ist gnuoc tumpraetze .
0,5243 der her chvomt sterben dvrrch dich .
0,5244 nv ist ez gnvoc billich .
0,5245 Swer selbe des todes ger .
0,5246 daz man s ovch den gewer .
0,5247 vn- swer ovch danne vehte .
0,5248 So gar wider dem rehte .
0,5249 vvan ez hat allez diz lant .

0,5250 ir vntrivwe wol erchant .
0,5251 vvie si ir frovwen verriet .
0,5252 daz si von ir eren schiet .
0,5253 herre de is war ich riete iv daz .
0,5254 daz ir ivch s bedahtet baz .
0,5255 ich erban iv des vil sere .
0,5256 daz wir iv ivwer ere .
0,5257 mvezzen benemen vn- den lip .
0,5258 vmbe ein so vngetrivwez wip .
0,5259 nv seht ir wol daz vnser dri sint .
0,5260 vn- waeret ir niht ein kint .
0,5261 So moht ir wol die rede lan .
0,5262 div iv an den lip mvoz gan .”
0,5263 Do sprach der riter mit dem levn .
0,5264 “ir mvgt mir harte vil gedrevn .
0,5265 ir n mvezzet mich bestan .
0,5266 ode die ivnchfrovwen lan .
0,5267 mir hat div vnschvldige magt .
0,5268 Bi dem eide gesagt .
0,5269 daz si wider ir frovwen si .
0,5270 aller vntrivwen fri .
0,5271 vn- daz si ir nie getaete .
0,5272 deheine misseraete .
0,5273 vvaz da von sint ivwer dri .
0,5274 vvaent ir daz ich eine si .
0,5275 Got gestvont der warheit ie .
0,5276 mit den beiden bin ich hie .
0,5277 ich weiz wol die gestent mir .
0,5278 Svs bin ich selbe dritte als ir .
0,5279 dar an ligt waene ich grozzer kraft .
0,5280 danne an ivwer geselleschaft .”
0,5281 do sprach der trvhsaezze .
0,5282 “Swes ich mich vermaezze .
0,5283 vvider vnsern herren got .
0,5284 des gewunne ich schaden vn- spot .
0,5285 herre ze dem drot ir mir .
0,5286 ich getrvwe im helfe baz danne ir .
0,5287 ich sihe ivch einen geverten han .
0,5288 den svlt ir heizzen hoher stan .
0,5289 iwern levn der hie stat .
0,5290 der andern der wirt gvot rat .
0,5291 hie ne vihtet niemen mit iv zwein .”
0,5292 do sprach der herre Iwein .
0,5293 “min lev vert mit mir z aller zit .
0,5294 ich n fvere in dvrch deheinen strit .
0,5295 ich n tribe in ovch von mir niht .
0,5296 vvert ivch sin tvo er iv iht .”
0,5297 do rieffen si alle vnder in .

0,5298 er n taete sinen levn hin .
0,5299 mit im vachte niemen da .
0,5300 vn- er mvese ovch sa .
0,5301 die ivnchfrovwen brinnen sehn .
0,5302 er sprach “des n sol niht geschehn .”
0,5303 Svs mvoze der lev hoher stan .
0,5304 doch n moht er des niht verlan .
0,5305 er n saehe vber den rvoke dan .
0,5306 Sinen herren wider an .
0,5307 Svs sint div wort hin geleit .
0,5308 vn- wuorden ze strite bereit .
0,5309 vn- waren alle viere .
0,5310 z en orsen chomen schiere .
0,5311 vn- liezzzen von einander gan .
0,5312 daz si ir pvoneiz mohten han .
0,5313 vn- triben alle dri dan .
0,5314 vvider vf den einen man .
0,5315 Swaz div ors mohten gevarn .
0,5316 dar vnder mvos er sich bewarn .
0,5317 dar nach als ein wise man .
0,5318 der sine ritterschaft wol chan .
0,5319 vn- sine kraft mit listen .
0,5320 ze rehten staten fristen .
0,5321 Si brachen vf im alle ir sper .
0,5322 daz sine daz behielt er .
0,5323 er warf daz ors von in .
0,5324 vn- leisierte hin .
0,5325 von in eins akers lanc .
0,5326 vn- tet schiere widerwanc .
0,5327 er drvocte vaste sin sper .
0,5328 vor vf die brvst her .
0,5329 als in div gewonheit lerte .
0,5330 vn- als er zvo in cherte .
0,5331 do mvete in mit dem swerte .
0,5332 der trvhsaezze als er gerte .
0,5333 vor sinen brvodern zwein .
0,5334 den nam er vnder daz kinnebein .
0,5335 Rehte fliegende stach er in .
0,5336 enbor vz dem satel hin .
0,5337 daz er vf dem sande gelac .
0,5338 vn- alles des verpflac .
0,5339 des im ze schaden mohte chomen .
0,5340 Svs was der trost den zwein benom- .
0,5341 vvand er lac lange ane sin .
0,5342 nv riten wider vf in .
0,5343 die zwene die noch werten .
0,5344 vn- pflagen sin mit den swerten .
0,5345 als gvote riter solden .

0,5346 daz wart in wol vergolden .
0,5347 vvande ie sin eins slac .
0,5348 vaste wider zwein wac .
0,5349 er bedorfte wol kraft vn- wer .
0,5350 vvan zwene waren ie eins her .
0,5351 Die ivnchfrovwen baten alle got .
0,5352 daz er sine gnade vn- sin gebot .
0,5353 in ze helfe cherte .
0,5354 vn- in ir kempfen erte .
0,5355 daz er in ze troste .
0,5356 ir gespiln erlostete .
0,5357 nv ist got so gnaedeche vn- so gvot .
0,5358 vn- so reine gemvot .
0,5359 daz er niemer kvnde .
0,5360 So manigem svezzen mvnde .
0,5361 Betlichiv dinc versagen .
0,5362 ovch waren si niht zagen .
0,5363 die in da an vahten .
0,5364 vvande si in brahten .
0,5365 in vil angestliche not .
0,5366 z ware ane den tot .
0,5367 Bechvomberten si in sere .
0,5368 doch n mohten si im dehein ere .
0,5369 fvrnamens an gewinnen .
0,5370 nv chom ze sinen sinnen .
0,5371 der trvhsaezze wider .
0,5372 vn- en lac niht me da nider .
0,5373 er bvorte schilt vn- swert .
0,5374 vn- lief ze den brvodern wert .
0,5375 do dvhte den levn er het zit .
0,5376 Sich ze heben in den strit .
0,5377 vn- lief sa den genden man .
0,5378 vil vnerbarmeclichen an .
0,5379 vn- zarte im daz ysen .
0,5380 man sach die ringe risen .
0,5381 Sam si waeren von stro .
0,5382 Svs entworht er in do .
0,5383 vvand er in gar zefvorte .
0,5384 Swaz er sin gervorte .
0,5385 von im gewan frov Lvnet .
0,5386 fride von des levn bet .
0,5387 div bet was nivwan der tot .
0,5388 des frevte si sich des gienc ir not .
0,5389 Hie lac der trvhsaezze .
0,5390 nv wart der lev raezze .
0,5391 ze sinen kampfgenozen .
0,5392 die manigen slac grozen .
0,5393 heten enpfangen vn- gegeben .

0,5394 vverten si nv wol daz lebn .
0,5395 daz was in gvot fvr den tot .
0,5396 vvande si bestvont ein michel not .
0,5397 hie waren zwene wider zwein .
0,5398 vvand ez en mohte der herre Iwein .
0,5399 den levn niht vertriben .
0,5400 do liez er z ovch beliben .
0,5401 er het siner helfe wol enborn .
0,5402 vn- liez ez ovch ane grozzen zorn .
0,5403 daz er in sine helfe spranch .
0,5404 er n sagt es im danc noch vndanc .
0,5405 Svs vahten si bedenthalben an .
0,5406 hie der lev dort der man .
0,5407 ovch en sparten si lip noch den mvot .
0,5408 Solden si da von sin behvot .
0,5409 Si waren werhaft gnvoc .
0,5410 vnz ir ietweder slvoc .
0,5411 dem levn eine wunden .
0,5412 do er der het enpfvnden .
0,5413 do wart er raezzzer vil danne e .
0,5414 ovch tet dem hern Iwein we .
0,5415 daz er den levn wunden sach .
0,5416 daz bescheind er wol wan er zebrach .
0,5417 Sine senfte gebaerde .
0,5418 von des levn beswaerde .
0,5419 Gewan er zornes also vil .
0,5420 daz er si brahte vf daz zil .
0,5421 daz si vil gar verlvorn ir kraft .
0,5422 vn- gehabten vor im zagehaft .
0,5423 Svs waren si vberwvnden .
0,5424 iedoch mit vier wunden .
0,5425 die si im heten geslagen .
0,5426 doch en horte in niemen clagen .
0,5427 deheinen schaden der im geschach .
0,5428 nivwan sins levn vngemach .
0,5429 nv was ze den ziten site .
0,5430 daz der schvldigaere lite .
0,5431 den selben tot den der man .
0,5432 Solde liden den er an .
0,5433 mit kampfe vor gerihte sprach .
0,5434 ob ez also geschach .
0,5435 daz er mit kampfe vnschvlddech wart .
0,5436 daz n wart ovch hie niht gespart .
0,5437 Si wuorden vf den rost geleit .
0,5438 der frovwen Luneten waren bereit .
0,5439 die ivnchfrovwen alle .
0,5440 mit manigem fvozvalle .
0,5441 Gnadeten si im sere .

0,5442 vn- erbvoten im alle die ere .
0,5443 der er von in gervochte .
0,5444 vn- fvrbaz danne er svochte .
0,5445 frov Lvnet wart vil fro .
0,5446 vvand ez gezoch ir also .
0,5447 Si gewan ir frovwen hvlde .
0,5448 vn- het ane schvlde .
0,5449 erliten kvomber vn- not .
0,5450 des ergazte si si vnz an ir tot .
0,5451 noch erchande in da weder wip noch man .
0,5452 vn- schiet ovch also von dan .
0,5453 nivwan eine frov Lvnet .
0,5454 div daz dvrch sin gebot tet .
0,5455 daz si in niemen nande .
0,5456 daz in div niht erchande .
0,5457 div doch sin herce bi ir trvoc .
0,5458 daz was wunders gnvoc .
0,5459 doch bat si in vil verre .
0,5460 Si sprach “lieber herre .
0,5461 dvrch got belibet hie bi mir .
0,5462 vvand ich sihe wol daz ir .
0,5463 vn- iwwer lev sit starche wunt .
0,5464 Lat mich ivch machen gesvnt .”
0,5465 Svs sprach der namlose do .
0,5466 “ich n gewinne gemach noch n wurde fro .
0,5467 niemer vnz vf den tac .
0,5468 daz ich wider gehalten mac .
0,5469 miner frovwen hvlde .
0,5470 der mangel ich ane schvlde .”
0,5471 Si sprach “vil selten ich daz wip .
0,5472 Beide ir mvot vn- ir lip .
0,5473 iemer geprise .
0,5474 vvande si en ist niht wise .
0,5475 div einem also frvomen man .
0,5476 als iv noch hie schinet an .
0,5477 iemer ir hvlde widerseit .
0,5478 ob si niht grozzez herceleit .
0,5479 vf in ze sprechen hat .”
0,5480 er sprach “niemer werde min rat .
0,5481 ir wille en waere ie min gebot .
0,5482 nv gebiete ir vnser herre got .
0,5483 daz si mich bedenche enzit .
0,5484 der chvomber der mir nahen lit .
0,5485 den sag ich niemen wizze christ .
0,5486 vvan dem er doch gewizzen ist .
0,5487 Swie nahen er mine- hercen ge .”
0,5488 Si sprach “ist er danne iemen me .
0,5489 Gewizzen wan iv zwein .”

0,5490 "ia frowwe" sprach her Iwein .
0,5491 Si sprach "wan nennet ir si doch ."
0,5492 er sprach "frowwe nein ich noch .
0,5493 ich mvoz ir hvlde e haben baz ."
0,5494 Si sprach "nv sagt mir doch daz .
0,5495 vwie sit ir selbe genant ."
0,5496 er sprach "ich wil sin erchant .
0,5497 Bi minem levn der mit mir vert .
0,5498 mir ne werde ir hvlde baz beschert .
0,5499 So wil ich mich iemer schamen .
0,5500 mins libes vn- mins rehten namen .
0,5501 vvil ich mich niemer gefrevn .
0,5502 ich heizze der riter mit dem levn .
0,5503 vn- swer iv fvr dise tage .
0,5504 von einem riter iht sage .
0,5505 des geverte ein lev si .
0,5506 da erkennet mich bi ."
0,5507 Div frowwe sprach "wie mac daz chom- .
0,5508 daz ich von iv niht han v'nom- .
0,5509 vn- ivch nie mer gesach ."
0,5510 der riter mit dem levn sprach .
0,5511 "daz iv von mir niht ist geseit .
0,5512 daz machet min vnwerdecheit .
0,5513 ich mohte mit dem mvote .
0,5514 mit libe vn- mit gvote .
0,5515 Gefrvomt han div maere .
0,5516 daz ich erkander waere .
0,5517 vvirt min gelvoche als gvot .
0,5518 als min herce min mvot .
0,5519 ich weiz wol so gedien ich daz .
0,5520 daz ir mich noch erchennet baz ."
0,5521 Si sprach "ir n sit ein boeser man .
0,5522 danne iv noch hie schinet an .
0,5523 So sit ir aller eren wert .
0,5524 vn- des ich e han gegert .
0,5525 des baete ich aber hvlf ez iht .
0,5526 mich dvnchet ich n vberwinde niht .
0,5527 daz laster vn- die schande .
0,5528 Swer ivch vz minem lande .
0,5529 also wunden siht varn ."
0,5530 er sprach "got mvezze ivch bewarn .
0,5531 vn- gebe iv saelde vn- ere .
0,5532 ich n belibe hie niht mere ."
0,5533 Div frowwe aber do sprach .
0,5534 "Sit ir versprechet min gemach .
0,5535 So ergib ich ivch in gotes segn .
0,5536 der mac ivwer baz gepflegn .
0,5537 vn- rvoche dvrch sine gvete .

0,5538 ivwer swaerez gemvete .
0,5539 vil schiere vercheren .
0,5540 ze frevden vn- ze eren .”
0,5541 dannen schiet er trvrech do .
0,5542 vvider sich selben sprach er so .
0,5543 “frovwe wie lvtzel dv nv weist .
0,5544 daz dv den slvzzel eine treist .
0,5545 dv bist daz sloz vn- der schrin .
0,5546 da daz herce min .
0,5547 inne beslozzen lit .”
0,5548 nv het er ritens zit .
0,5549 ovch volget im von dan .
0,5550 deweder wip noch man .
0,5551 nivwan eine frovwe Lvnet .
0,5552 div im geselleschaft tet .
0,5553 einen gvoten wec hin .
0,5554 da gelobte si wider in .
0,5555 daz si sit allez war liez .
0,5556 mit ir trivwen si im gehiez .
0,5557 daz si sin wol gedaechte .
0,5558 vn- ez ze rede braechte .
0,5559 vmbe sine swaere .
0,5560 Getrivwe vn- so gewaere .
0,5561 vvas div gvote frov Lvnet .
0,5562 daz si z willeclichen tet .
0,5563 des gnadet er ir wol tvsent stvnt .
0,5564 nv was der lev so stanche wunt .
0,5565 daz er michel arbeit .
0,5566 mit im vf dem wege erleit .
0,5567 do er niht mere mohte gan .
0,5568 do mvos er von dem rosse stan .
0,5569 vn- las zesamne mit der hant .
0,5570 mies vn- swaz er lindes vant .
0,5571 vn- legte daz vnder in .
0,5572 in sinen schilt vn- hvop in hin .
0,5573 vf daz ros fvr sich .
0,5574 daz lebn was gnvoc kvomberlich .
0,5575 Svs leit er arbeit gnvoc .
0,5576 vnz daz in der wec trvoc .
0,5577 da er eine bvrch ersach .
0,5578 dar chert er do dvrch sin gemach .
0,5579 vn- vant beslozzen daz tor .
0,5580 vn- einen knappen da vor .
0,5581 der erkande wol sins herren mvot .
0,5582 Sin herre was biderbe vn- gvot .
0,5583 daz was wol an dem knappen schin .
0,5584 er hiez in willechomen sin .
0,5585 ze gvoter handelvnge .

0,5586 man sagt daz in betwunge .
0,5587 div vil wegemvediv not .
0,5588 daz er da nam daz man im bot .
0,5589 man mac den gast lihte vil .
0,5590 Geladen . der beliben wil .
0,5591 im wart daz tor vf getan .
0,5592 do sach er gegen im gan .
0,5593 Riter vn- knehte .
0,5594 die in nach sine- rehte .
0,5595 enpfiegen vn- grvozten .
0,5596 vn- im vil gerne bvozten .
0,5597 Sinen kvomber vn- sine not .
0,5598 als in ir herre gebot .
0,5599 der selbe gegen im gienc .
0,5600 vn- in froliche enpfieci .
0,5601 vn- schvof im selhen gemach .
0,5602 daz er wol an den werchen sach .
0,5603 daz sin wille vn- sin mvot .
0,5604 vvas reine vn- gvot .
0,5605 im wart vil harte drate .
0,5606 ein heinlich chemnate .
0,5607 ze siner svnder gereit .
0,5608 Sin lev dar in zvo im geleit .
0,5609 dar inne entwafent man in .
0,5610 nv sande der wirt hin .
0,5611 nach zwein sinen kinden .
0,5612 daz niemen mohte vinden .
0,5613 Schoener ivnchfrovwen zwo .
0,5614 den bevalch er in do .
0,5615 daz s im sine wunden .
0,5616 Salbeten vn- bvnden .
0,5617 ovch wonte in ir gemvete .
0,5618 ze schoener kvnst div gvete .
0,5619 daz si vil schier ernerten .
0,5620 in vn- sinen geverten .
0,5621 hie twelt er viercehn naht .
0,5622 vnz daz er sins libes maht .
0,5623 vil gar wider gewan .
0,5624 vn- e er schiede von dan .
0,5625 do begvnde der tot in den tagen .
0,5626 einen graven beclagen .
0,5627 vn- mit gewalte twingen .
0,5628 ze notigen dingen .
0,5629 den von dem swarzen dorne .
0,5630 des was er der verlorne .
0,5631 vvand er mvose im ze svone gebn .
0,5632 Sinen gesvnt vn- daz lebn .
0,5633 der dannoch lebende hie .

0,5634 zwo schoene ivnchfrovwen lie .
 0,5635 nv wolde div alte .
 0,5636 die ivngen mit gewalte .
 0,5637 von ir erbe scheiden .
 0,5638 daz dienen solt in beiden .
 0,5639 da zvo div ivnger sprach .
 0,5640 “Swester disen vngemach .
 0,5641 den sol dir got verbieten .
 0,5642 ich wande mich nieten .
 0,5643 Grozzes liebes mit dir .
 0,5644 Swester dv bist mir .
 0,5645 ze vngnaediges mvotes .
 0,5646 vvil dv mich mins gvotes .
 0,5647 vn- miner eren . behern .
 0,5648 des wil ich mich mit kampfē wern .”
 0,7346 [...] [...] vn- stvont noch vf der wage ir lebē .
 0,7347 vnz daz div naht an gienc .
 0,7348 vn- ez div vinstē vndervienc .
 0,7349 Svs schiet si beide div naht .
 0,7350 vn- daz ir ietweders maht .
 0,7351 vvōl was dem andern kvnt .
 0,7352 vn- daz si beide da ze stvnt .
 0,7353 an einander gnvocte .
 0,7354 vn- sit ez sich wol fvocte .
 0,7355 daz si z mit eren mohten lan .
 0,7356 So liezzē si z wol vnderstan .
 0,7357 vnz an den andern tac .
 0,7358 Si taten als er ie pflac .
 0,7359 der ie rehten mvot gewan .
 0,7360 Swie leide dem frvomen man .
 0,7361 von dem andern geschiht .
 0,7362 chvomt ez von mvotwillen niht .
 0,7363 ob er im den willen trvege .
 0,7364 daz er in gerne slvege .
 0,7365 er ist im doch niht gehaz .
 0,7366 vn- behagt im baz .
 0,7367 danne da bi ein boeser man .
 0,7368 des er nie schaden gewan .
 0,7369 Daz wart an in zwein wol schin .
 0,7370 Sich verchvnte der her Iwein .
 0,7371 wider sinen kampfgenoz .
 0,7372 vvand ez fvr eine gabe groz .
 0,7373 ir ietweder haben wolde .
 0,7374 ob er wizzen solde .
 0,7375 vver der ander waere .
 0,7376 Siniv wehselmaere .
 0,7377 Begvnd er wider in han .
 0,7378 er sprach “nv wir han verlan .

0,7379 vnser nitlichez spil .
0,7380 ich mac nv reden daz ich wil .
0,7381 Ich minnet ie von miner maht .
0,7382 den liechten tac fvr die naht .
0,7383 da lac vil miner frevden an .
0,7384 vn- frevt noch wip vn- man .
0,7385 der tac ist frolich vn- clar .
0,7386 div naht trvebe vn- swar .
0,7387 vvande si div herze trvebet .
0,7388 So der tac vebet .
0,7389 manheit vn- wafen .
0,7390 So wil div naht slafen .
0,7391 ich minnet vnz an dise frist .
0,7392 den tac fvr allez daz der ist .
0,7393 de is war edel riter gvot .
0,7394 nv habt ir den selben mvot .
0,7395 vil gar an mir vercheret .
0,7396 der tac si gvneret .
0,7397 ich hazze in iemer mere .
0,7398 vvand er mir alle min ere .
0,7399 vil nach het genomen .
0,7400 div naht si got willechomen .
0,7401 Sol ich mit frevden alten .
0,7402 daz hat si mir behalten .
0,7403 nv seht ob ich von dem tage .
0,7404 niht grozzen kvomber vn- clage .
0,7405 vvol von schvlden haben mege .
0,7406 vn- waer er langer drier slege .
0,7407 die heten iv den sic gegeben .
0,7408 vn- mir benomen daz lebn .
0,7409 des erlat mich disiv liebiv naht .
0,7410 div rvowe git mir nivwe maht .
0,7411 da nach get abe ein swaere tac .
0,7412 daz ich danne vehten mac .
0,7413 mvoz ich niht wol sorgen .
0,7414 vf den tac morgen .
0,7415 Got en welle mich s erlan .
0,7416 So mvoz ich aber bestan .
0,7417 den allertivrsten man .
0,7418 des ich kvnde ie gewan .
0,7421 den ich da meine daz sit ir .
0,7422 Got der bewar mir .
0,7423 minen lip vn- min ere .
0,7424 ich n geforht ir nie so sere .
0,7425 vn- wizzet daz ich nie gewan .
0,7426 ze tvonne mit deheinem man .
0,7427 den ich so gerne erkande .
0,7428 ir moht ane schande .

0,7429 mir wol sagen iwwern namen .”
0,7430 “ich n wil mich wider ivch niht schamen .”
0,7431 Sprach der herre Gawein .
0,7432 “wir gehellen beide in ein .
0,7433 herre ir habt mich des fvrldigen .
0,7434 het ir eine wile geswigen .
0,7435 die rede die ir habt getan .
0,7436 die wold ich gesprochen han .
0,7437 daz ir da minnet daz minne ich .
0,7438 des ir da sorget daz hat mich .
0,7438a in vil grozze sorge braht .
0,7438b vve daz ie kampfes wart gedaht .
0,7439 ez ist hivte hin ein tac .
0,7440 den ich wol iemer hazzen mac .
0,7441 er hat mir die not getan .
0,7442 der ich ie was erlan .
0,7443 mir benam de is war nie mere .
0,7444 dehein man also sere .
0,7445 mine werliche maht .
0,7446 vn- moht ir vor der naht .
0,7447 ze zwein slegen han gesehn .
0,7448 So mvese ich iv des siges iehn .
0,7449 ich han der naht vil chvme erbiten .
0,7450 Swaz ich noch han gestriten .
0,7451 So gewan ich nie so grozze not .
0,7452 ich fvrhte laster ode den tot .
0,7453 von iv gewinnen morgen .
0,7454 vvir sin in gelichen sorgen .
0,7455 vn- si iv daz fvr war geseit .
0,7456 daz ich dvrch ivwer frvomcheit .
0,7457 iv aller der eren gan .
0,7458 der ich niht harte engelten chan .
0,7459 min herce ist leides vberladen .
0,7460 daz ich vf iwwern schaden .
0,7461 iemer sol gedenchen .
0,7462 vn- swa ez mich niht svl krenchen .
0,7463 da geschehe iv alles des ir gert .
0,7464 des sit ir weiz got wol wert .
0,7465 ich wolde daz ez waere also .
0,7466 daz dise ivnchfrovwen zwo .
0,7467 heten swaz si dvhte gvot .
0,7468 vn- daz wir diensthaften mvot .
0,7469 vnder einander solden tragen .
0,7470 ich wil iv minen namen sagen .
0,7471 herre ich heizze Gawein .”
0,7472 “Gawein .” “ia .” “wie wol daz schein .
0,7473 disen vnsenften tac .
0,7474 manigen vientlichen slac .

0,7475 han ich von iv enpfangen .
0,7476 ivwer haz ist ergangen .
0,7477 vber ivwern gewissen dienstman .
0,7478 vn- da ne zwifel ich niht an .
0,7479 Swaz ir mir leides habt getan .
0,7480 des waer ich alles erlan .
0,7481 het ich mich enzit genant .
0,7482 vvir waren wilen baz erchant .
0,7483 herre ich bin ez Iwein .”
0,7484 do wonte vnder in zwein .
0,7485 Liebe bi leide .
0,7486 Si frevten sich beide .
0,7487 daz si zesamne waren chomen .
0,7488 daz ir ietweder het genomen .
0,7489 des andern dehein arbeit .
0,7490 daz was ir beider herceleit .
0,7491 Beide trvren vn- haz .
0,7492 Rvmden gahes daz vaz .
0,7493 vn- richsent dar inne .
0,7494 frevde vn- minne .
0,7495 daz erzeigten si wol vnder in .
0,7496 div swert wuorfen si hin .
0,7497 vn- lieffen einander an .
0,7498 ez n gelebte nie dehein man .
0,7499 deheinen liebern tac .
0,7500 vn- en weiz ovch niht ob iemen mac .
0,7501 also lieben gelebn .
0,7502 als in got da het gegeben .
0,7503 Si vnderchvosten tvsent stvnt .
0,7504 ovgen wange vn- mvnt .
0,7505 Do der kvnech die minne .
0,7506 vn- div kvneginne .
0,7507 vnder in beiden sahen .
0,7508 vn- frivndes vmbevahen .
0,7509 des wundert si sere .
0,7510 vn- en twelten niht mere .
0,7511 Si begvnden dar gahen .
0,7512 vvande si si gerne sahen .
0,7513 So frivntliche gebaren .
0,7514 vn- wer si beide waren .
0,7515 daz was da noch vnbechant .
0,7516 vvan als man ez sit bevant .
0,7517 in heten die helme vn- div naht .
0,7518 ir gesivne bedaht .
0,7519 vn- des kampfes grimme .
0,7520 verwandelt ir stimme .
0,7521 daz si da waren vnerchant .
0,7522 heten si sich niht genant .

0,7523 Do sprach der her Iwein .
0,7524 “der tac der da hivte schein .
0,7525 daz swert daz den slac trvoc .
0,7526 den ich hivte vf ivch geslvoc .
0,7527 div mvezzen gvnert sin .
0,7528 her Gawein lieber herre min .
0,7529 vvaz mag ich sprechen mere .
0,7530 vvan daz ich ivch ere .
0,7531 als ivwer riter vn- ivwer kneht .
0,7532 daz ist min wille vn- min reht .
0,7533 ir habt mich ofte geret .
0,7534 vn- ze gvote gecheret .
0,7535 min dinc so volleclichen .
0,7536 daz man mir in den richen .
0,7537 mer gvotes hat veriehn .
0,7538 danne es ane ivch waere geschehn .
0,7539 ob ich ivch da wider mohte .
0,7540 Geren als ez tohte .
0,7541 des wold ich iemer wesn fro .
0,7542 nv ne mag ich anders wan also .
0,7543 daz ich ivwer Iwein .
0,7544 iemer schine vn- ie schein .
0,7545 nivwan hivte disen tac .
0,7546 den ich wol iemer heizzen mac .
0,7547 die gallen in dem iare .
0,7548 vvand ez n wart z ware .
0,7549 vveder min hant noch min swert .
0,7550 nie der vnmazen wert .
0,7551 daz si iv ie geslvegen slac .
0,7552 ich verwazze swert vn- den tac .
0,7553 ovch sol min vngewizzen hant .
0,7554 ir geltes selbe sin ein pfant .
0,7555 daz s iv daz ze wandel gebe .
0,7556 daz s iv diene vnz ich lebe .
0,7557 herre Gawein doch n moht ir .
0,7558 niht baz gerochen sin an mir .
0,7559 Si hat mich gvneret .
0,7560 vn- iwern pris gemeret .
0,7561 Si hat sich selben so erwert .
0,7562 daz iv der sic ist beschert .
0,7563 ich sicher in ivwer gebot .
0,7564 vvan daz weiz vnser herre got .
0,7565 daz ich sigelos bin .
0,7566 ich scheide ivwer gevangen hin .”
0,7567 “Herre vn- lieber geselle nein .”
0,7568 Sprach der herre Gawein .
0,7569 “daz sich dehein min ere .
0,7570 mit iwerm laster mere .

0,7571 der eren han ich gerne rat .
0,7572 der min frivnt laster hat .
0,7573 vvaz tohte ob ich mich selben trvege .
0,7574 Swaz eren ich mich an zvege .
0,7575 doch hant si alle wol gesehn .
0,7576 vvaz vnder vns beiden ist geschehn .
0,7577 ich sicher vn- ergibe mich .
0,7578 der sigelose bin ich .”
0,7579 Der herre Iwein antwuort im do .
0,7580 “ir waenet lihte daz also .
0,7581 disiv sicherheit geschehe .
0,7582 daz ich ir iv ze liebe iehe .
0,7583 vvaeret ir mir der fremdest man .
0,7584 der ie ze kriechen hvs gewan .
0,7585 e ich ivch so bestvende me .
0,7586 z ware ich sichert iv e .
0,7587 von rehte sicher ich von div .”
0,7588 “Nein herre geselle ich sicher iv .”
0,7589 Sprach der herre Gawein .
0,7590 Svs werte vnder in zwein .
0,7591 ane losen lange zit .
0,7592 dirre frivntliche strit .
0,7593 vnz der kvnech vn- div diet .
0,7594 Beide fragte vn- riet .
0,7595 vvaz vnder disen livten .
0,7596 div minne mohte divten .
0,7597 dem hazze also nahen .
0,7598 den si e da sahen .
0,7599 des man im schiere beiach .
0,7600 Sin neve der herre Gawein sprach .
0,7601 “herre wir svln ez iv gerne sagen .
0,7602 daz man vns iht habe fvr zagen .
0,7603 noch daz des iemen wan habe .
0,7604 daz wir mit dirre fvoge iht abe .
0,7605 des strites chomen wellen .
0,7606 vvir waren e gesellen .
0,7607 daz was vns leider vnkvt .
0,7608 hivte vnz an dise stvnt .
0,7609 nv ne wont niht hazzes bi vns zwein .
0,7610 ich ivwer neve Gawein .
0,7611 han gestriten wider in .
0,7612 dem ich diensthafter bin .
0,7613 danne in der werlde ieman .
0,7614 vnz er mich fragen began .
0,7615 vvie ich waere genant .
0,7616 als im min nam wart erchant .
0,7617 do nande er sich sa .
0,7618 vn- rvmde vientschaft da .

0,7619 vn- gehellen iemer mer in ein .
0,7620 ez ist min geselle her Iwein .
0,7621 vn- gelovbet mir daz ich iv sage .
0,7622 het er z gehabt an dem tage .
0,7623 mich het braht in arbeit .
0,7624 min vnreht vn- sin manheit .
0,7625 div ivnchfrovwe hat rehtes niht .
0,7626 fvr die man mich hie vehten siht .
0,7627 ir swester ist mit rehte hie .
0,7628 So half ovch got den rehten ie .
0,7629 des waere ich tot von siner hant .
0,7630 het ez div naht niht erwant .
0,7631 Sit mir geviel daz vnheil .
0,7632 So ist mir lieber ein teil .
0,7633 nach grozzem vngevelle .
0,7634 daz mich min geselle .
0,7635 habe vberwunden danne erslagen .”
0,7636 die rede begynde her Iwein clagen .
0,7637 vn- wart vor leide schamrot .
0,7638 daz er im der eren bot .
0,7639 ein lvtzel mere danne gnvoc .
0,7640 daz eren er im niht vertrvoc .
0,7641 vvan redet er wol so redet er baz .
0,7642 hie was zorn ane haz .
0,7647 des frevte der kvnech sich .
0,7648 er sprach “ir mvezzet an mich .
0,7649 den strit lazen beide .
0,7650 daz ich n iv bescheide .
0,7651 des ivch dvrch reht gnveget .
0,7652 vn- sich mir ovch fveget .”
0,7653 Div rede wart im bevolhen gar .
0,7654 die ivnchfrovwen ladet er dar .
0,7655 er sprach “wa ist nv div magt .
0,7656 div ir swester hat versagt .
0,7657 nivwan dvrch ir vbermvot .
0,7658 ir erbeteil vn- ir gvot .
0,7659 daz in ir vater beiden lie .”
0,7660 do sprach si gahes “ich bin hie .”
0,7661 do si sich also versprach .
0,7662 vn- vnrehtes selbe iach .
0,7663 des wart Artvs der kvnech fro .
0,7664 ze gezivge zoch er si alle do .
0,7665 er sprach “frovwe ir habt veriehn .
0,7666 daz ist vor so vil diet geschehn .
0,7667 daz ir s niht wider mvgt chomen .
0,7668 daz ir ir nv habt genomen .
0,7669 daz mvezzet ir ir wider gebn .
0,7670 vvelt ir nach gerihte lebn .”

0,7671 “Nein” sprach si “herre herre dvrch got .
0,7672 ez stet in iwerm gebot .
0,7673 Beide gvot vn- lip .
0,7674 ia gesprichet lihte ein wip .
0,7675 des si niht sprechen solde .
0,7676 Swer daz rechen wolde .
0,7677 daz wir wip gesprechen .
0,7678 der mvese vil gerechen .
0,7679 vvir wip bedvrfen alle tage .
0,7680 daz man vns tvmbe rede v’trage .
0,7681 vvande si vnderwilen ist .
0,7682 herte . vn- doch ane argen list .
0,7683 Gevaerlich vn- doch ane haz .
0,7684 vvan wir ne kvnnen leider baz .
0,7685 Swie ich mit Worten habe gevarn .
0,7686 doch svlt ir iwver reht bewarn .
0,7687 daz ir mir iht gewalt tvot .”
0,7688 er sprach “ich laze iv iwver gvot .
0,7689 vn- iwver swester habe daz ir .
0,7690 der strit ist lazen her ze mir .
0,7691 ovch hat sich div gvote .
0,7692 mit invaltem mvote .
0,7693 So gar her ze mir verlan .
0,7694 Si mvoz ir teil ze rehte han .
0,7695 Gehellen wir zwei in ein .
0,7696 ez giht min neve Gawein .
0,7697 daz er den sic verlorn habe .
0,7698 So chvomt ir des strites abe .
0,7699 mit laster vn- ane ere .
0,7700 Svs ist ez iemer mere .
0,7701 iwver pris vn- iwver heil .
0,7702 Lat ir mit minnen ir teil .”
0,7703 Diz redt er wand er weste .
0,7704 ir herze also veste .
0,7705 an hertem gemvete .
0,7706 dvrch reht noch dvrch gvete .
0,7707 het si z niemer getan .
0,7708 Si mvese gewalt vn- forhte han .
0,7709 Svs gewan si forhte von der dro .
0,7710 “nv tvot der mit” sprach si do .
0,7711 “weder minre noch me .
0,7712 nivwan daz iv rehte ste .
0,7713 ich wil vn- mvoz si wern .
0,7714 Sit ir sin niht welt enbern .
0,7715 ich teile ir livte vn- lant .
0,7716 des sit ir bvrge vn- pfant .”
0,7717 Do sprach der kvnech “daz si getan .”
0,7718 wand ez an in was verlan .

0,7719 So wart ez wol verendet .
 0,7720 verbvrgt vn- verpfendet .
 0,7721 daz si ir teil ze rehte enpfie .
 0,7722 der kvnech sprach . do daz ergie .
 0,7723 “neve Gawein nv entwafen dich .
 0,7724 So entwafent ovch her Iwein sich .
 0,7725 vvande iv ist beiden rvowe not .”
 0,7726 do taten si daz er gebot .
 0,7727 Nv was der lev vz chomen .
 0,7728 als ir e habt vernomen .
 0,7729 da er in geslozzten wart .
 0,7730 vn- iagte vf sins herren vart .
 0,7731 do si in zvo in sahen .
 0,7732 dort vber velt gahen .
 0,7735 do floch man vn- wip .
 0,7736 dvrch behalten den lip .
 0,7737 vnz daz der her Iwein sprach .
 0,7738 “er n tvot iv dehein vngemach .
 0,7739 er ist min frivnt vn- svochet mich .”
 0,7740 do verstvonden si alrerst sich .
 0,7741 daz ez der degn maere .
 0,7742 mit dem levn waere .
 0,7743 von dem si wunder horten sagen .
 0,7744 vn- der den risen het erslagen .
 0,7745 “Geselle” sprach her Gawein do .
 0,7746 ich mac wol iemer sin vnfro .
 0,7747 daz ich iv svs gedanchet han .
 0,7748 des ir mir liebes habt getan .
 0,7749 den risen slvoget ir dvrch mich .
 0,7750 des rvomde min niftel sich .
 0,7751 vvande ir enbvot mir z bi ir .
 0,7752 “ez het dvrch mich” seit si mir .
 0,7753 “der riter mit dem levn getan .”
 0,7754 ir n woldet si niht wizzen lan .
 0,7755 vvie ir waeret genant .
 0,7756 do neic ich vmbe in elliv lant
 0,7757 ich n weste war ode wem .
 0,7758 vvand ich meind ez hin ze dem .
 0,7759 der dvrch mich bestvont die not .
 0,7760 vn- es n letze mich der tot .
 0,7761 ich gedien ez iemer als ich sol .
 0,7762 ich erchenne ivch bi dem levn wol .
 0,7763 Svs lief der lev zvo im her .
 0,7764 Sinem herren erzeiget er .
 0,7765 frevde vn- frivntschaft .
 0,7766 mit aller der kraft .
 0,7767 als ein stvmmez tier dem man .
 0,7768 frivntschaft erzeigen chan .

0,7769 Zehant wart in beiden .
 0,7770 ein rvowe bescheiden .
 0,7771 da in gnade vn- gemach .
 0,7772 zvo ir wunden geschach .
 0,7773 arzat gewan her Gawein .
 0,7774 im selbem vn- in zwein .
 0,7775 ze heilen ir wunden .
 0,7776 ovch pflac ir z allen stvnden .
 0,7777 div kvnegin vn- Artvs .
 0,7778 des bweten si daz siechhvs .
 0,7779 vil vnlange stvnt .
 0,7780 vnz daz si waren wol gesvnt .
 0,7781 Do dem hern Iwein wart gegeben .
 0,7782 kraft vn- gesvnt lebn .
 0,7783 noch waren im die sinne .
 0,7784 von siner frovwen minne .
 0,7785 So manigen wis ze verhe wunt .
 0,7786 in dvhte ob in ze kvrzer stvnt .
 0,7787 Sin frovwe niht en loste .
 0,7788 mit ir selber troste .
 0,7789 So mves ez schiere sin sin tot .
 0,7790 in twanch div minnende not .
 0,7791 vf disen gaehen gedanc .
 0,7792 “ich trib ez kvrz ode lanc .
 0,7793 So ne weiz ich wie ir minne .
 0,7794 iemer gewinne .
 0,7795 vvan daz ich zvo dem brvnnen var .
 0,7796 vn- giezze dar vn- aber dar .
 0,7797 Gewinne ich chvomber da von .
 0,7798 So bin ich chvombers wol gewon .
 0,7799 vn- lide in gerner kvrze tage .
 0,7800 danne daz ich iemer kvomber trage .
 0,7801 ovch lid ich chvomber iemer me .
 0,7802 ir n getvo der kvomber ovch so we .
 0,7803 daz ich noch ir minne .
 0,7804 mit gewalt gewinne .”
 0,7805 Mit sinem levn stal er sich dar .
 0,7806 daz sin niemen wart gewar .
 0,7807 da ze hove noch anderswa .
 0,7808 vn- machte chvombers weter da .
 0,7809 daz wart als vngehiure .
 0,7810 daz in dem gemivre .
 0,7811 niemen trvwet genesn .
 0,7812 “verflvochet mvezz er iemer wesn .”
 0,7813 Sprach da wip vn- man .
 0,7814 der ie von erste began .
 0,7815 Bvwen hie ze lande .
 0,7816 diz leit vn- dise schande .

0,7817 tvot vns ein man swenn er wil .
0,7818 Boeser stet der ist vil .
0,7819 iedoch ist diz div boeste stat .
0,7820 dar vf ie hvs wart gesat .
0,7821 Daz waltgevelle wart so groz .
0,7822 vn- der sivs vn- der doz .
0,7823 werte mit dem schalle .
0,7824 daz er die livte alle .
0,7825 Gar verzwifeln tet .
0,7826 Do sprach ir ivnchfrovwe Lvnet .
0,7827 “frovwe chvomt vil drate .
0,7828 der dinge ze rate .
0,7829 vva ir den man vindet .
0,7830 mit dem ir vberwindet .
0,7831 disen schaden vn- diz leit .
0,7832 der ist iv weiz got vngereit .
0,7833 man en svoche in danne verre .
0,7834 ir n moht schande merre .
0,7835 niemer gewinnen .
0,7836 Swenn er nv scheidet hinnen .
0,7837 alles strites erlan .
0,7838 der iv diz laster hat getan .
0,7839 diz geschiht iv aber morgen .
0,7840 ir n welt baz besorgen .
0,7841 die selben sache .
0,7842 man lat ivch mit gemache .
0,7843 niemer mere gelebn .”
0,7844 “maht v mir danne rat gebn .”
0,7845 Sprach div frovwe zvo ir magt .
0,7846 “nv si dir min not geclagt .
0,7847 vvan dv mins dinges weist .
0,7848 also vil so iemen meist .”
0,7849 Si sprach “frovwe ir habt den rat .
0,7850 der wol baz ze staten stat .
0,7851 ich bin ein wip naeme ich mich an .
0,7852 ze raten als ein wise man .
0,7853 So waere ich tvmber danne ein kint .
0,7854 ich lide mit den andern die hie sint .
0,7855 daz mir ze liden geschiht .
0,7856 vnz man noch dirre tage gesiht .
0,7857 vven ivwer rat vinde .
0,7858 von ivwerm gesinde .
0,7859 der dise bvrde an sich nem .
0,7860 vn- daz er vns ze herren zem .
0,7861 ez mac wol sin daz ez geschiht .
0,7862 iedoch verwaene ich mich sin niht .”
0,7863 Si sprach “dv solt die rede lan .
0,7864 ich n han gedingen noch wan .

0,7865 daz ich in iemer vinde .
0,7866 in minem gesinde .
0,7867 nv rat dar nach daz beste .”
0,7868 Si sprach “der danne weste .
0,7869 den riter der den risen slvoc .
0,7870 vn- der mich lasters vbertrvoc .
0,7871 daz er mich von dem roste .
0,7872 hie vor iv erlost .
0,7873 der iv den selben svochte .
0,7874 ob er chomen gervochte .
0,7875 So ne waer ez niender baz bewant .
0,7876 doch ist mir ein dinc wol erchant .
0,7877 ez n hvlfe niemens list .
0,7878 vnz im sin frowe vngnaedeich ist .
0,7879 daz er fvere dvrch in .
0,7880 vveder her ode hin .
0,7881 er n taete im danne sicherheit .
0,7882 daz er nach rehter arbeit .
0,7883 mit allen sinen dingen .
0,7884 da nach hvlfe ringen .
0,7885 ob er dvrch in iht taete .
0,7886 daz er wider haete .
0,7887 Siner frowen minne .”
0,7888 div frowe sprach “die sinne .
0,7889 der mir vnser herre gan .
0,7890 die chere ich alle dar an .
0,7891 Beide lip vn- gvot .
0,7892 daz ich im ir zornmvot .
0,7893 vertribe ob ich iemer mac .
0,7894 des enpfach minen hantslac .”
0,7895 Do sprach aber frowe Lvnet .
0,7896 “ir sit svezze vn- iwer bet .
0,7897 welch gvot wip waere von den siten .
0,7898 die ir ze flize woldet biten .
0,7899 div iht versagen kvnde .
0,7900 einem also Svezzen mvnde .
0,7901 ob es iv ane falschen list .
0,7902 ernst wirt ode ernst ist .
0,7903 So mvoz er wol ir hvlde han .
0,7904 ich n mac ivch des niht erlan .
0,7905 ir n geheizzet im z mit eide .
0,7906 e daz ich von iv scheide .”
0,7907 des eides was si gereit .
0,7908 frow Lvnet gap ir den eit .
0,7909 vn- wart vil gar vz genomen .
0,7910 daz im ze staten mohte chomen .
0,7911 nach dem si da solde varn .
0,7912 Si sprach “frowe ich mvoz bewarn .

0,7913 mit selhen witzten den eit .
0,7914 daz mich deheiner falscheit .
0,7915 iemen zihe dar an .
0,7916 er ist ein vil staete man .
0,7917 nach dem ich da riten sol .
0,7918 vn- bedarf da staeter rede wol .
0,7919 vvelt ir nach im senden .
0,7920 div wort mit werchen enden .
0,7921 der ich z em eide niht enbir .
0,7922 So sprechet frowwe nach mir .”
0,7923 die vinger wuorden vf geleit .
0,7924 Alsvs gap si den eit .
0,7925 “Ob der riter her chvomt .
0,7926 vn- mir ze miner noete frvomt .
0,7927 mit dem der lev varnde ist .
0,7928 daz ich ane allen argen list .
0,7929 mine maht vn- minen sin .
0,7930 dar an cherende bin .
0,7931 daz ich im wider gewinne .
0,7932 Siner frowwen minne .
0,7933 ich bit mir got helfen so .
0,7934 daz ich iemer werde fro .
0,7935 vn- dise gvoten heiligen .”
0,7936 do ne was da niht verswigen .
0,7937 des er bedvrfen solde .
0,7938 den si bringen wolde .
0,7939 Sich vnderwant frow Lvnet .
0,7940 der reise die si gerne tet .
0,7941 hin reit div gvote .
0,7942 mit frolichem mvote .
0,7943 vn- was ir doch ze der stvnt .
0,7944 Lvtzel dar vmbe chvnt .
0,7945 do si der verte begvnde .
0,7946 vva si in fvnde .
0,7947 vn- wart ir kvrzliche kvnt .
0,7948 ir vil saeliger fvnt .
0,7949 vvan si in bi dem brvnnen vant .
0,7950 er was ir bi dem levn erchant .
0,7951 ovch erchande si ir herre .
0,7952 do er si sach von verre .
0,7953 mit gvotem willen grvozt er si .
0,7954 “daz ich ivch so nahen bi .
0,7955 fvnden han des lob ich got .
0,7956 frowwe Lvnet ist diz ivwer spot .
0,7957 ode habt ir mich gesvochet .”
0,7958 “ia herre ob ir s gervochet .”
0,7959 “waz ist daz ir gebiet .”
0,7960 “da habt ir ivch geniet .

0,7961 ein teil von iwwern schvlden .
0,7962 vn- von ir vnhvlden .
0,7963 von der iv diente diz lant .
0,7964 vn- div mich vz hat gesant .
0,7965 einer langen arbeit .
0,7966 Si ne welle brechen danne ir eit .
0,7967 div mich da vz sendet .
0,7968 So han ich iv verendet .
0,7969 die rede also verre .
0,7970 daz ir aber min herre .
0,7971 vwerden svlt in kvrzer frist .
0,7972 als si min frowe ist .”
0,7973 Hie was groz frevde von in zwein .
0,7974 doch n wart min her Iwein .
0,7975 vor des nie als fro .
0,7976 von grozzen frevden chvost er do .
0,7977 Siner ivnchfrowen mvnt .
0,7978 vvange vn- ovgen tvsent stvnt .
0,7979 er sprach “ir habt bescheinet .
0,7980 vil wol wie ir mich meinet .
0,7981 ich fvrhte sere vn- ist min clage .
0,7982 daz mir des gvotes vn- der tage .
0,7983 ode beider zerinne .
0,7984 e ich die grozzen minne .
0,7985 ze rehte vmb ivch verschvlden mvge .
0,7986 als ez dem dienste tvge .
0,7987 den ir mir . habt getan .”
0,7988 Si sprach “die rede svlt ir lan .
0,7989 ir gewinnet tage vn- daz gvot .
0,7990 het ich gedient den mvot .
0,7991 daz mir gnade wuorde schin .
0,7992 vn- swem ir gnaede woldet sin .
0,7993 ich n han niht baz wider ivch getan .
0,7994 ir n welt ez danne baz enpfan .
0,7995 danne der des andern gvot entnimt .
0,7996 vn- swenne in geltes gezimt .
0,7997 daz er im geltes ist bereit .
0,7998 ir entlihet mir michel arbeit .
0,7999 do ich waere verbrant .
0,8000 ob ir z niht het erwant .
0,8001 fvr minen lip was ivwer lebn .
0,8002 vf die wage gegeben .
0,8003 do gabet ir mir disen lip .
0,8004 ez verdienen niemer tvsent wip .
0,8005 die gnade die ir mir habt getan .”
0,8006 er sprach “die rede svlt ir lan .
0,8007 ir habt vaste vberzalt .
0,8008 mir ist vergolten tvsentfalt .

0,8009 Swaz ich ie dvrch ivch getet .
0,8010 nv sagt mir frowe Lvnet .
0,8011 vveiz si doch daz ich ez bin .”
0,8012 Si sprach “daz waere der vngewin .
0,8013 Si ne weiz von iv gelovbet mir z .
0,8014 z er werlde mere wan daz ir z .
0,8015 der riter mit dem levn sit .
0,8016 Si bevindet ez noch ze gvoter zit .”
0,8017 Do riten si ze hvse dan .
0,8018 vn- in bechom da wip noch man .
0,8019 daz n fvocte ovch anders niht .
0,8020 nivwan ein wunderlich geschiht .
0,8021 daz si da niemen riten sach .
0,8022 vnz si ergriffen ir gemach .
0,8023 do gienc frow Lvnet .
0,8024 da si an ir gebet .
0,8025 ir frowen alterseine vant .
0,8026 vn- sagt ir zehant .
0,8027 daz er chomen waere .
0,8028 do ne het si dehein maere .
0,8029 also gerne vernomen .
0,8030 Si sprach “nv si er willechomen .
0,8031 ich wil in harte gerne sehn .
0,8032 Swie daz mit fvoge mac geschehn .
0,8033 Gench hin zvo im vn- ervar .
0,8034 vvil er her ode sol ich dar .
0,8035 daz si wan ich bedarf sin .
0,8036 er gienge nach mir bedorft er min .”
0,8037 vil schiere braht in frow Lvnet .
0,8038 er fvor swie in div varn tet .
0,8039 Gewafent daz im nihtes gebrast .
0,8040 Si enpfie den wirt fvr einen gast .
0,8041 vn- bi dem ersten grvozze .
0,8042 viel er ir ze fvozze .
0,8043 vn- het doch deheine bet .
0,8044 do sprach frow Lvnet .
0,8045 “frowe heizzet in vf stan .
0,8046 vn- als ich im geheizzen han .
0,8047 So svlt ir loesen den eit .
0,8048 ich sag iv mit der warheit .
0,8049 daz div helfe vn- der rat .
0,8050 nivwan an iv einer stat .”
0,8051 Si sprach “nv bewise mich .
0,8052 dvrch sinen willen tvon ich .
0,8053 Swaz ich mac vn- sol .”
0,8054 Si sprach “frowe ir redet wol .
0,8055 nv ne hvlfe im niemen baz .
0,8056 Sin frowe div im ist gehaz .

0,8057 Gebiet ir div lat ir zorn .
0,8058 Gebiet ir er ist verlorn .
0,8059 vn- moht iv daz wol wesn leit .
0,8060 ir n habt mit der warheit .
0,8061 deheinen bezzern frivnt dann er ist .
0,8062 ez wolde vnser herre christ .
0,8063 vn- wiste mich vf die vart .
0,8064 daz er so gahes fvnden wart .
0,8065 daz div fremde von iv zwein .
0,8066 vvuorde gesament in ein .
0,8067 So ne sol ivch danne dehein ander not .
0,8068 Gescheiden niemer ane den tot .
0,8069 nv behalt ivwer warheit .
0,8070 vn- loeset den eit .
0,8071 vergebt im sine missetat .
0,8072 vvand er dehein ander frowen hat .
0,8073 noch gewinnet noch nie gewan .
0,8074 diz ist her Iwein ivwer man .”
0,8075 Div rede dvhte si wunderlich .
0,8076 vn- trat vil gahes hinder sich .
0,8077 Si sprach “has tv mir war geseit .
0,8078 So hat mich din karcheit .
0,8079 vvunderliche hin gegeben .
0,8080 Sol ich dem hinne fvrder lebn .
0,8081 der vf mich dehein ahte hat .
0,8082 de is war des het ich gerne rat .
0,8083 mir ne getet daz weter nie so we .
0,8084 daz n wold ich iemer liden e .
0,8085 danne ich ze langer stvnde .
0,8086 mins libes gvnde .
0,8087 deheinen so gemvoten man .
0,8088 der nie dehein ahte vf mich gewan .
0,8089 vn- sage dir mit der warheit .
0,8090 twnge mich s niht der eit .
0,8091 So waer ez vnergangen .
0,8092 der eit hat mich gevangen .
0,8093 der zorn ist minhalp da hin .
0,8094 Gedienen mvezze ich noch vmb in .
0,8095 daz er mich lieber welle han .
0,8096 dann er noch habe getan .”
0,8097 Der herre Iwein frolichen sprach .
0,8098 do er gehorte vn- sach .
0,8099 daz im sin rede ze heile slvoc .
0,8100 vn- der kvomber den er trvoc .
0,8101 daz der ein ende solde han .
0,8102 “Frovwe ich han missetan .
0,8103 z ware daz rivwet mich .
0,8104 ovch ist daz gewonlich .

0,8105 daz man dem schvldigen man .
 0,8106 Swie swaere schvlde er ie gewan .
 0,8107 nach rivwe schvlde vergebe .
 0,8108 vn- daz er in der bvozze lebe .
 0,8109 daz er z niemer mer getvo .
 0,8110 nv ne hoeret anders niht da zvo .
 0,8111 vvan chvom ich nv ze hvlden .
 0,8112 Si ne wirt von minen schvlden .
 0,8113 niemer mere verlorn .”
 0,8114 Si sprach “ich han es gesworn .
 0,8115 ez waere mir lieb ode leit .
 0,8116 daz ich s mit gewarheit .
 0,8117 iht wider chomen kvnde .”
 0,8118 er sprach “diz ist div stvnde .
 0,8119 die ich wol iemer heizzen mac .
 0,8120 miner freuden ostertac .”
 0,8121 Do sprach div kvnegin .
 0,8122 “her Iwein lieber herre min .
 0,8123 tvot gnaedecliche an mir .
 0,8124 Grozzen chvomber habt ir .
 0,8125 von minen schvlden erliten .
 0,8126 des wil ich ivch dvrch got biten .
 0,8127 daz ir rvochet mir vergebn .
 0,8128 vvand er mich vnz ich han daz lebn .
 0,8129 von hercen iemer rivwen mvoz .”
 0,8130 da mit viel si an sinen fvoz .
 0,8131 vn- bat in harte verre .
 0,8132 “Stet vf” sprach der herre .
 0,8133 “ir n habt deheine schvlde .
 0,8134 vvan ich het iwver hvldē .
 0,8135 nivwan dvrch minen mvot verlorn .”
 0,8136 Svs wart versvenet der zorn .
 0,8137 Hie sach div frovwe Lvnet .
 0,8138 die svone div ir sanfte tet .
 0,8139 Swa man vn- wip .
 0,8140 habent gvot vn- lip .
 0,8141 Schone sinne vn- ivgent .
 0,8142 ane ander vntvgent .
 0,8143 vverdent div gesellen .
 0,8144 div kvnnen vn- wellen .
 0,8145 einander behalten .
 0,8146 Lat div got alten .
 0,8147 div gewinnent manige svezze zit .
 0,8148 daz was hie allez waenlich sit .
 0,8149 Sie was frov Lvnet mite .
 0,8150 nach ir diensthaftem site .
 0,8151 div het mit ir sinne .
 0,8152 ir beider vnminne .

0,8153 Braht z allem gvote .
 0,8154 als si in ir mvote .
 0,8155 Lange het gegert .
 0,8156 ir dienst was wol lons wert .
 0,8157 ovch waene si s also genoz .
 0,8158aa daz si des kvomers niht verdroz .
 0,8158ab er londe ir nach frovn saelden bet .
 0,8158ac Bvrge lant riche stet .
 0,8158ad machet er ir vndertan .
 0,8158ae vn- als ich vernomen han .
 0,8158af Si ne wart mit hirat niht betrogen .
 0,8158ag einem richen herzogen .
 0,8158ah Schoenem ivngen manhaft .
 0,8158ai volchomen gar an ritterschaft .
 0,8158aj vvise vn- gewaere .
 0,8158ak milte vn- erbaere .
 0,8158al dem gab er si ze wibe .
 0,8158am von gebvrt vn- an libe .
 0,8158an vvas si wol in der ahte .
 0,8158ao daz si mit eren mahte .
 0,8158ap Riches landes frovwe sin .
 0,8158aq der kvnech vn- div kvnegin .
 0,8158ar heten vberwunden .
 0,8158as an den selben stvnden .
 0,8158at mit frevden alle ir swaere tage .
 0,8158au des ich got noch gnade sage .
 0,8158av vvan swaz er chvomers erleit .
 0,8158aw die wile er sine frovwen meit .
 0,8158ax da mit was ir niht ze wol .
 0,8158ay ir lip was hercerivwe vol .
 0,8158az Si trvoc der sorgen vberlast .
 0,8158ba So daz ir leides nie gebrast .
 0,8158bb vnz vf die saeligen zit .
 0,8158bc daz gvot gemvete den strit .
 0,8158bd Behabte an swaerem mvote .
 0,8158be Si heten nv mit gvote .
 0,8158bf ir leides vergezzen .
 0,8158bg vn- frevde besezzen .
 0,8159 ez was gvot lebn waenlich hie .
 0,8160 ich n weiz aber waz ode wie .
 0,8161 in sit geschaehe beiden .
 0,8162 ez n wart mir niht bescheiden .
 0,8163 von dem ich die rede habe .
 0,8164 dvrch daz en chan ovch ich dar abe .
 0,8165 iv niht gesagen mere .
 0,8166 vvan got gebe vns saelde vn- ere .